



Broj: 02-04-486/21  
Datum, 29.03.2021. godine

## ZAPISNIK sa 5. redovne sjednice 7. saziva Općinskog vijeća Doboj Istok

Peta redovna sjednica 7. saziva Općinskog vijeća održana je dana 25.03.2021. godine u zgradi općine Doboj Istok u Klokotnici sa početkom u 10,00 sati.

**PRISUTNI:** 16 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Izet Škrebo, predsjednik Organizacije ratnih vojnih invalida općine Doboj Istok, Hava Mešić, predsjednica Organizacije porodica šehida i poginulih boraca općine Doboj Istok, Alma Vehabović, predstavnik Crvenog križa Doboj Istok, Asim Hodžić, predsjednik Organizacije demobilisanih boraca općine Doboj Istok, Sudina Hadžić, predsjednica Udruženja žena Doboj Istok, Senad Batalević, predsjednik Udruženja građana dobitnika najvećih ratnih priznanja općine Doboj Istok, Ermin Mujkanović, predstavnik Dobrovoljnog vatrogasnog društva općine Doboj Istok, te predstavnik RTV TK.

**ODSUTNI:** Mehmed Mehinović, vijećnik SBiH.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvažene načelnice sa saradnicima, uvažene kolegice i kolege vijećnici, uvaženi gosti, predstavnici udruženja, predstavnici medija esalamu alejkum i dobar dan. Otvaram 5. redovnu sjednicu 7. saziva Općinskog vijeća Doboj Istok. Zamolio bih tehničkog sekretara da utvrdi broj prisutnih na današnjoj sjednici. Prisutno je 16 vijećnika, a odsutan je Mehmed Mehinović koji je najavio odsustvo, što znači da imamo kvorum za održavanje današnje sjednice.“

### USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste Zapisnik sa 4. redovne sjednice VII saziva Općinskog vijeća. Otvaram diskusiju ako neko ima primjedbu. Nema. Ko je za?“

Glasanje: ZA – 15, PROTIV – 0, UZDRŽANIH – 1.

### VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ako ima neko pripremljeno vijećničko pitanje ili inicijativu od vijećnika.“

Emira Karić, predsjednica kluba vijećnika SDP: „ Ja imam jednu vijećničku inicijativu, a inicijativa se odnosi na formiranje COVID patronažnog tima pri JZU Dom zdravlja Doboj Istok na period od naredna tri mjeseca. Ovaj tim bi obilazio COVID pacijente sa jasnim zadacima. Na ovaj način bi se prije svega pomoglo zaraženim građanima Doboj Istoka, ambulantom porodične medicine, te Službe hitne medicinske pomoći. Ono što je olakšavajuće kod realizacije ove inicijative je uredba Vlade TK po kojoj se mogu povući medicinski radnici sa biroa bez javnog konkursa. Ja ću imati pravo na repliku ukoliko budete imali nešto protiv ove inicijative, odnosno ako mislite da je ona nepotpuna itd. da je ne bih sadržinski sada pojašnjavala.“

*Senada Džanić, predsjednica kluba vijećnika SBB – BPS – SBiH: „ Uvaženi predsjedavajući, zamjeniče, kolegice i kolege vijećnici, načelnice sa saradnicima, predstavnici udruženja i medija sve vas selamim i pozdravljam. Prije nego što pročitam vijećničke inicijative i pitanja podsjetila bih predsjedavajućeg i zamjenika da već imam nekoliko pitanja na koja nisam dobila odgovor od službenih lica koja bi te odgovore trebala da daju. Ne odgovaranjem na pitanja smatram da sam nevažena, što me vrijeđa, kao i građane čiju problematiku iznosim kroz ista. Izabrani sam predstavnik građana, kao i svi ostali u Općinskom vijeću, te ovdje trebamo biti svi ravnopravni. Podsjećam vas da je po članu 158. Poslovnika o radu Općinskog vijeća regulisano vrijeme za koje treba odgovoriti na postavljena pitanja, a u članu 22. stav 5. vi se starate o primjeni Poslovnika o radu Općinskog vijeća. I vi predsjedavajući i vi zamjeniče imate više mandata u Općinskom vijeću i smatram da se ovakav propust ne bi smio dogoditi. Krenut ću od vijećničkih pitanja.*

*1. Zašto načelnik ne nastupi kod Elektroprivrede BiH, odnosno Poslovnice Elektrodistribucije Tuzla zadužene za područje općine Doboj Istok da se dovrši rekonstrukcija niskonaponske mreže i drugih aktivnosti na poboljšanju bezbjednosti snabdijevanja stanovništva električnom energijom?*

*OBRAZLOŽENJE: Više od deset godina na području općine Doboj Istok u toku je rekonstrukcija niskonaponske mreže. U pojedinim dijelovima naselja ti radovi su realizovani, ali niti u jednom naselju nije dovršeno. Dijelovi naselja koji su bliži magistrali imali su rekonstrukciju mreže i premještanja strujomjera dok u udaljenijim dijelovima skoro da ništa nije urađeno. Dešava se da se postave stubovi i radovi prestaju na dvije-tri godine. Umjesto izmještanja strujomjera na stubove isti se samo zamjenjuju drugim sumnjive kvalitete i često potrošači prijavljuju da im se sa tim povećala potražnja naplate. I najžalosnije od svega je što je to stanje ostalo samo na području naše opštine. Građani koji uplate novi priključak na elekromrežu i pored insistiranja često čekaju tri i više mjeseci na realizaciju istog. Ovo navedeno je dovoljan razlog da se u interesu građana izvrši pritisak na ovu firmu.*

*2. Da li je Služba za urbanizam i prostorno planiranje provela obilježavanje na terenu zemljišta koje je zamjenom prešlo u vlasništvo Općine Doboj Istok?*

*OBRAZLOŽENJE: Zamjena zemljišta koju je izglasalo Općinsko vijeće u 2015-oj godini u vlasništvo Općine Doboj Istok prešlo je zemljište na lokaciji „Debeljaci“ u Brijesnici Maloj. Kako se to zemljište nalazi na visoravni koja tromedi sa Brijesnicom Malom, Stjepan Poljem i Malešićima postoji interes građana, udruženja građana i izletnika da se na pomenutoj lokaciji uredi prostor pogodan za boravak. Kako se ne zna tačna veličina prostora i lokacija potrebno je izvršiti obilježavanje iste kako ne bi dolazilo do nesuglasica sa ranijim vlasnikom. Isti prostor dobio bi na kvaliteti uređenosti, a stanovništvu šireg područja doprinio popravci kvalitete života u ovo teško vrijeme.*

*Vijećnička inicijativa:*

*Obraćam se Općinskom vijeću sa inicijativom da se na lokaciji Šehidskog mezarja "Debelo brdo" obezbijede kante za smeće, te da se uradi sanacija dovoda vode, kao i sanacija same česme. Također, isto mezarje nije osvijetljeno noću, a smatram da bi trebalo biti, te na istom mezarju ni 1. marta nije bilo državne zastave, a smatram da ona treba da se viori 365 dana u godini.*

*OBRAZLOŽENJE: Uz lokaciju mezarja "Debelo brdo" izgrađeno je igralište na kojem se svakodnevno okuplja veći broj osoba. To okupljanje za posljedicu ima odlaganje veće količine smeća. Smeće se nalazi na cijelom prostoru oko igrališta, pa i u samom mezarju. Znamo da se u sklopu mezarja nalazi i mezarje šehida Doboj Istoka, a ovakvo stanje oko i u samom mezarju*

*izaziva negativne reakcije posjetilaca bolne većini nas, a posebno članovima njihovih porodica. Ne treba napominjati da je smeće svakojake vrste, ambalaža alkoholnih i bezalkoholnih pića koja se često nalaze i uz mezarove ili u njihovoj neposrednoj blizini. Česma koja se nalazi u sklopu mezarja je oštećena i nefunkcionalna a korito iste služi za odlaganje pomenutog smeća. Stvarna namjena te česme i vode je svima poznata. Ovakvo stanje narušava ljepotu jedne od najljepših lokacija na našem području, a da se ne pominje da je neprimjereno ovakvo ponašanje. U vezi svega navedenog smatram da je ova inicijativa opravdana te da bi njenim usvajanjem, provođenjem i uvođenjem povećanog nadzora urednosti na ovoj lokaciji iskazali svoje poštovanje ovom mjestu, ali i najboljim sinovima Bosne, našim šehidima. Komentar posjetilaca ovom mjestu, od kojih se i saznalo za ovaj problem, je da „Općina i Općinsko vijeće ne vode računa“.*

*Kemal Bratić, općinski načelnik: „ I ja sve prisutne srdačno selamim i pozdravljam i želim uspješan rad. Neću se osvrnuti na inicijative i iskoristit ću priliku da odgovorim na jedno od pitanja, a radi se o niskonaponskoj mreži. Meni je drago što imamo tu uposlenika Elektrodistribucije ili Elektroprivrede, ne znam gdje pripada. Ja sam rekao i na prošlom Vijeću, a ponovit ću to i sada, u toku su razgovori i pregovori i u planu Elektroprivrede je uvršten iznos sredstava za nabavku zemljišta i zgrade, tako da ćemo vjerovatno imati jaču ekipu ovdje koja će uraditi to. Nije lijepo da neko kaže zašto načelnik ne nastupi, a načelnik svakodnevno razgovara i sa Elektroprivredom i sa BH Telekomom, tako da nije lijepo da to stoji u inicijativi, odnosno u pitanju. Načelnik ne donosi plan ni BH Telekomu, ni Elektroprivrede, jer svaka poslovnica ima svoj plan. Pošto sam u kontaktu sa trenutnim šefom u Gračanici, čini mi se da se zove Adil, znam da čovjek belajše, jer ima manji broj uposlenika nego što bi trebao imati i da su ljudi 24 sata na terenu. Naravno mi uvijek želimo da znamo sve i da vodimo tuđu brigu. Oni su sama organizacija za sebe i njihova je dobra volja i na neki način naš pritisak kakav će oni plan imati. Ono što ja znam jeste da imaju plan da izmijene kompletnu mrežu. Šta ih je omelo ili zaustavilo, ne znam. Dovoditi u pitanje brojila koja se postavljaju da su sumnjivog porijekla, jesmo li mi to postali eksperti i za brojila i da znamo sve. Ja ne bih ulazio u te detalje i te stvari. Vezano za ovu zadnju inicijativu, malo mi je smiješno iako sam rekao da se neću osvrnuti. Ja koliko znam, te stvari gore postoje i koliko znam brine se o tom šehidskom mezarju i ne možemo reći da se niko ne brine. Taj projekat koji je ostvaren to je dobro, da ta djeca imaju negdje da izađu, jer nemaju gdje i u Ahimbašićima koliko ja znam to su radili mještani. Mi smo, naravno, podržali onoliko koliko je to bilo u našoj moći i ne vidim u tome ništa loše. Ako ima tih stvari za koje neko tvrdi da ima, a ja mislim da nema, jer imamo tu dva mještanina iz tog dijela i čovjeka koji radi u komunalnom, onda to treba otkloniti ili naći neko rješenje. Nemojte da vodimo lažnu brigu, to je jeftino i smiješno. Nemojte da vodimo brigu o nečemu o čemu nismo vodili 20 godina i sada nas je o svemu briga. Ljudi su gore uložili trud i napravili zajedno sa nama, napravili nešto lijepo i trebamo ići u tom pravcu da pokušamo u cijelom području naše općine da isto tako uradimo, ali isto tako ne može život stati ako se neko igra košarke. Ja nemam takvih informacija i vjerovatno bih do sada imao prijavu od policije da se to gore dešava.“*

*Senada Džanić, predsjednica kluba vijećnika SBB – BPS – SBiH: „Uvaženi načelniče, meni ništa nije smiješno što predstavlja problematiku građana Doboj Istoka. Posebno mi nije smiješno, ne znam kada ste vi bili, ja sam 1. marta bila na tom mezarju da proučim Fatihu. Ne znam šta vidite tu smiješno. Ni jedna od informacija nije donesena sa namjerom, a pomenuli ste ovdje poligon i ja se svakako i to sam pokazala na djelu, zauz imam se za sve pozitivno za našu omladinu. Smatram da je poligon nešto lijepo, omladina treba da se okuplja i nemam ništa protiv, međutim ambalaža koja se nalazi pored mezara i uz same mezare i u koritu gdje je nekada bila česma odlaže se smeće. Evo reći ću vam ćerka od jednog šehida kada je posjetila taj dan mezar svog babe rahmetli kaže da je pokupila svo to smeće i ostavila upravo u tom koritu, jer ono sada služi za odlaganje smeća, jer tu nema kanti za smeće. Sve što sam iznijela i sve što iznosim je problematika građana. Kada sam pričala kroz vijećnička pitanja za Elektroprivredu,*

*odnosno Poslovnicu Elektrodistribucije Tuzla i ako vi svakodnevno razgovarate kako mi imamo te probleme unazad 20 godina. Drugo, ja ne mogu voditi brigu prije nego što sam bila u Općinskom vijeću, a sada imam obavezu da vodim brigu o problemima građana Doboja Istoka.“*

*Hasan Hasančević, predsjednik kluba vijećnika SDA: „ Poštovani prisutni esalamu alejkum. Nisam mislio izlaziti, ali pošto je kolegica Senada održala ders predsjedavajućem i zamjeniku kako treba da rade, molim vas da vrijeme iznošenja bilo čega svedete na onoliko koliko sleduje određenog vijećnika, da li po inicijativi ili bilo čemu drugom. Drago mi je što su kolege i kolegice počeli da se šire na teritoriju Doboja Istoka. Do sada je to bila njihova mikrosredina i problem njihovih mjesnih zajednica i drago mi je što se to sada raširilo na ostale mjesne zajednice i ostale probleme građana. Međutim 100 puta sam rekao i ponovit ću 100 puta demagoški iznošenje ili predlaganje bilo čega nije dobro, obit će vam se o glavu. Dobro znate o čemu pričam, jer bilo šta da se predloži ili da predložimo moramo mi vijećnici predložiti konkretna rješenja. Nažalost pričate o Ahimbašićima gdje je jedno od ljepših i sređenijih mezarja u Doboju Istoku. To je ono što vi treba da pričate. Uvaženi predsjedavajući i zamjenice vodite samo računa da svima nama dajete vrijeme koje nam pripada.“*

*Refik Šuvalić, vijećnik SDA: „ Uvaženi predsjedavajući, načelnice, kolege i kolegice vijećnici i vijećnice, uvaženi gosti želim da vas sve srdačno selamim. Ja ću nastojati biti kratak. Inicijative kao inicijative su jako dobra stvar, međutim ja ovdje dosta stvari vidim gdje bi trebalo uraditi neke pregradnje. Dobra je ideja kolegice Emire po pitanju covidovog tima, možda je dobro i nije nama zabranjeno nikome od vijećnika, odnosno građana da preko nadležne institucije vidimo tehnički je li moguće i šta se može tu poboljšati. Znači, znamo da je napast ovog covida jako opasna i mislim da bi neke stvari trebali. Po pitanju šehidskog mezarja ja sam znao nalaziti osobe koje su došle nešto gore uraditi, jer nažalost vrlo malo ih je koji vide smeće i koji ga sklone. Ne bih složio ni sa kakvim pivama i što mene raduje gore su djeca koja nemaju adekvatno mjesto i oni to ostavljaju negdje u čošak, ali sve su flašice od soka i mi to povremeno i kosimo i čistimo. Voda je tehnički problem, jer je izvor iz kojeg je bio snabdijeven šehidski mezar nažalost pobjegao, a sa gradskog vodovoda tehnički nemamo mogućnosti, ali mi gore nešto konstantno radimo. Molio bih da se neke stvari ovako ne uvaličavaju i ako je to neki populizam da se sagledaju mogućnosti, jer neke stvari nisu toliko u domenu Vijeća, pa da ovdje gubimo dragocjeno vrijeme. Ja sam uvijek za da podržimo dobre ideje i da probamo rješavati.“*

*Kemal Skopljak, vijećnik BPS – Sefer Halilović: „ Pošto prvi puta izlazim želim da poselamim i pozdravim sve prisutne. Nisam mislio komentarisati ovo, ali neke stvari bole kada se čuju ovdje za govornicom neargumentovane. Znači kada već pričamo o inicijativama šta je loše u ovoj inicijativi da se postavi još koja kanta gore da se ima gdje taj otpad baciti? Ne vidim ništa loše. Šta je loše bilo u inicijativi da se pomogne ljudima koji su oboljeli od COVID-a po 100 KM da se participira? Ne vidim ništa loše. Za vas je ovdje to smiješno, za nas nije. Za nas to nije smiješno. Molim vas nemojte nikome da prijetite za ovom govornicom i to se obraćam kolegi. Znači šta će to se meni ili bilo kome od nas iz opozicije razbiti o glavu? Budite konkretni, pa kažite. Je li mi zaslužujemo da vi govorite takve stvari ovdje o nama zato što iznosimo inicijative, postavljamo vijećnička pitanja i želimo da sve bude javno i transparentno.“*

*Hasan Hasančević, predsjednik kluba vijećnika SDA: „Ja znam da kolega Skopljak nije strašljiv i ne znam kako je sebi skontao da mu neko prijeti. Dokaz nekih stvari su izbori građana. Neko dobije manje glasova, a neko više, neko konstantno pada, a neko raste. To je prijetnja našeg rada ovdje, mog i vašeg kolega, kolega svih i načelnika. Mi ovdje pričamo, pričamo, pa dođu izbori i opet jedni padaju, jedni rastu, a jedni ostaju isti. To je prijetnja i to je ono što se prepoznava. Čim izađemo odavde jedni piju kafu na jednom mjestu, drugi na drugom i to je što narod prepoznava i tako i glasa za one koje smatra da imaju priliku da raspoložu imovinom i općinom i svim.“*

*Emira Karić, predsjednica kluba vijećnika SDP: „ Ja sam rekla da mogu sadržinski objasniti svoju inicijativu, ali mi kao lokalni političari trebali bi gledati kako se to radi i na kantonalnom ili na federalnom nivou. Neki klubovi npr. na federalnom nivou ili na kantonalnom kažu nalaže se vladi da izradi izolatorijum. To se vladi da i tu nema na ovom placu, na onom placu, toliko hiljada, ovoliko itd. Mi ćemo ovdje vama pružiti mogućnost da JZU Dom zdravlja može povući sredstva iz svog resora, može potražiti upite, može uputiti zahtjeve itd. to nije moja stvar da ovdje objašnjavam. Moja je da dam inicijativu, a realizacija inicijative ide prema Domu zdravlja, ako vi prihvatite, ako ne prihvatite ne ide nigdje. Znači ide prema Domu zdravlja, a Dom zdravlja nalazi mogućnosti realizacije ove inicijative ili vraća nekim odgovorom ili zaključkom Vijeću. Mi nismo dužni ovdje inicijative finansijski obrazlagati ili ne znam kako ili ju prihvatate ili ju ne prihvatate, a kažem postoje mnoga pitanja i mnoge inicijative na višim nivoima koje su samo u jednoj proširenoj rečenici i to ljudi shvate. Isto tako šef kluba upozorava da se trebamo držati tačnog vremena diskusije, replike i sl. zatim zabranjuje da se citira član Poslovnika kojim se skreće pažnja na nečije dužnosti. Dozvoljavate sada predsjedavajući da šef kluba SDA rasplamsa diskusiju, a na prethodnoj sjednici nisam smjela reći ni riječi kada je u pitanju ovaj tajming, odnosno vijećničke inicijative i pitanja i nisam čak smjela ni da obrazložim ni da repliciram.“*

*Izet Hodžić, zamjenik predsjedavajućeg Općinskog vijeća: „Poštovani načelnice sa saradnicima, uvažene koleginice i kolege vijećnici, poštovani predsjedavajući, dragi naši gosti, prestavnici medija želim sve iskreno da vas poselamim i pozdravim. Kolegama i koleginicama da zaželim uspješan rad da ne bude nekakve napetosti. Ovo je sastavni dio rada i dokaz kada neki tamo dušebrižnici kažu, ja se nekada mogu složiti sa nekim dijelom, da treba ukinuti vijećnički paušal i treba 100%. Prvo bih se osvrnuo na zadnje izlaganje koleginice Emire, ja ne razumijem termin zabranjuje. Je li neko za govornicom uputio nekome riječ da se zabrani obraćanje zamjeniku i predsjedavajućem u skladu sa Poslovníkom o radu? Pošto se odnosi na mene direktno, ja nisam razumio da je bilo ko ovdje rekao da se zabrani nekome nekakva diskusija ili nešto na tu temu. Jednostavno osjećao sam se prozvanim. Drugo, što se tiče vijećničke inicijative koleginice Emire, vijećnička inicijativa je OK i sve je u redu, a da li ima sve potrebne segmente koje treba da ima vijećnička inicijativa, ona je u svom repliciranju obrazložila. Ono što ja mogu reći, prije svega kao građanin, kao konzument usluga JZU Dom zdravlja Doboj Istok, neću zloupotrijebiti ovu govornicu, kao pacijent koji je prebolovao COVID – 19, mogu da kažem da mi ovaj tim u sklopu JZU Dom zdravlja posjedujemo. Znači oni pacijenti koji ne mogu da dođu na pregled i kojima treba usluga, neću reći ljekara, nego medicinskih tehničara oni tu uslugu konzumiraju u svom domu. Ne dolaze ljudi iz doma zdravlja Petrovo Selo ili iz Gračanice da pruže ili iz Doboja, nego dolaze uposlenici Doma zdravlja Doboj Istok da pruže uslugu potrebnu koju procijeni COVID ljekar u tom momentu, odnosno ljekar iz COVID tima na kućnoj adresi u domu pacijenta koji je bolestan. Ja znam da to postoji iz vlastitog iskustva i uvjerio sam se da je to svakodnevna praksa. Ne vidim razloga zašto bi mi sada pored što imamo bojler i toplu vodu izmišljali nešto još pored toga. Znači imamo to svakodnevno ako pacijent ne može doći ide sanitetsko vozilo na adresu tog oboljelog. Sada treba Vijeće da donosi odluku na odluku. Jednostavno ne vidim pravo obrazloženje svega toga. Da li treba, kako vi rekoste u inicijativi formiranje patronažnog COVID tima, Vijeće da određuje ili ko će odrediti menadžmentu Doma zdravlja koji je sastav tog patronažnog tima. Ja vam kažem da imamo to. Ja se nisam smijao na vaša izlaganja, nisam gestikulirao, nisam ništa i dozvoljavam da izađete za govornicu i kažete, jer ja govorim iz prakse ništa ne izmišljam. Što se tiče inicijative koleginice Džanić apsolutno ne želim da budem pogrešno shvaćen. Znači šehidska populacija, naši šehidi, ljudi koji su zaslužni što smo ovdje, što imamo svoju državu i što imamo sve ovo što imamo i ne treba to zaboraviti. Problem vjerovatno nije u svemu tome. Ako se sjećate, a i vi ste bili u prethodnom mandatu u sazivu Općinskog vijeća, donosili smo mi odluke ko ima obavezu da se stara i brine o čišćenju mezarja, a između ostalog i šehidskih mezarja na području općine Doboj Istok. Iskreno govoreći*

*malo mi je zaparalo uši zašto je to samo ovo šehidsko mezarje izdvojeno, ne mogu sam sebi odgonetnuti zbog čega je to samo šehidsko mezarje Debelo brdo. Ja znam i ne treba mi niko govoriti da je tu najviše šehida sahranjeno ili ukopano, ali znamo isto tako da su porodice šehida i poginulih boraca i džematski odbori nadležni da vode brigu i da čiste. Ako je istina, a ne mogu tvrditi da nije, da nema državne zastave na šehidskom mezarju, normalno da to treba da se ispravi. Ja ako želim da izlazim za govornicu ja ću naći hiljadu primjera i hajmo oformiti komisiju i obići svako mezarje, jer u svakom mezarju imaju šehidski mezari i vidjet ćemo da iz jednog ugla vi gledate, a iz drugog ugla ja gledam. Opet sam se našao u tome, jer kako sam ja razumio vi ste indirektno optužili Općinsko vijeće za stanje takvo kakvo jeste na području i lokalitetu šehidskog mezarja Debelo brdo u Ahimbašićima. Znači, imamo komunalno preduzeće, imamo džematski odbor i imamo udruženje građana šehidskih porodica i poginulih boraca. Ne kažem da mi osobno, lično treba da brinemo, normalno ko hoće, ali ne treba da to bude nekakva moja samoreklama ili bilo čija druga.“*

*Senada Džanić, predsjednica kluba vijećnika SBB – BPS – SBiH: „Pošto nisam dobila priliku vijećniku Hasanu Hasančeviću želim uputiti repliku. Ja ću zamoliti sve građane Doboj Istoka da mene kazne sa glasovima ako budem kriva da se urade kante za smeće na cijeloj općini, da se urade česme tamo gdje trebaju, da se postavi rasvjeta, da živimo u ljepšoj i urednijoj općini i rado ću snositi krivicu za to. Iz ove inicijative vi ste izdvojili dio koji govori o tome šta bi trebalo uraditi, a pričamo o poštovanju najboljim sinovima, našim šehidima. Mislila sam da ne pominjem imena, međutim ćerka našeg šehida je rekla da to uradim ako treba, a radi se o Aldini Hadžić koja svake godine 1. marta dođe na mezar svom babi šehidu i taj dan je bila. Zastave nema, česma ne radi, kanta za smeće fali, osvjetljeno nije i sve sam to kroz inicijativu rekla. U prostoru gdje je bila česma, korito, sada se odlaže smeće i ništa ovdje nije loše i nije ništa o čemu Općinsko vijeće ne bi trebalo povesti računa. Takođe sam u inicijativi naglasila da se radi o jednoj od najljepših lokacija na Doboj Istoku. Ja znam ovo što je gospodin Refik govorio da se puno vas brine o tom mezarju i da se puno toga radi, ali govorim da je ovo još jedan dio koji svakako trebamo riješiti i ne vidim šta je tu loše. Što se tiče Hasane, pomenuli ste termin dersanje, u mom riječniku i životu ja nikome, ni svom djetetu ne znam dersati, a pogotovo ne bi u jednoj ovakvoj instituciji našla za shodno za govornicom da sebi to priuštim. Ja sam samo podsjetila na Poslovnik o radu Općinskog vijeća članu 22. stav 5. i zamolila predsjedavajućeg i zamjenika da ispoštuju šta treba i ništa drugo. Molim vas takav termin mislim da ne dolikuje za tako nešto.“*

*Hasan Hasančević, predsjednik kluba vijećnika SDA: „Meni je drago što je kolegica Senada pobjegla od stvari što sam ja rekao da se počinje interesovati za cijeli Doboj Istok i meni je to drago. Koliko je falilo? Dlaka je falila prošli puta na izborima, a za sljedeće će se potruditi neko drugi. Za kolegicu Emiru, mi možemo ovdje donijeti da načelnik treba da uradi to i to i nalaže se, ali da bi mi bili potpuni pa izvještaj načelnika za tri mjeseca, za šest mjeseci, usvajanje budžeta i onda kažemo mi smo načelniku naložili i ona sredstva se pravdaju i mi glasamo za što treba. Kada ste glasali za bilo kakav izvještaj načelnika, a da mu nalažemo. Ja njega ne branim, niti bilo koju vladu. Znači mi nalažemo da oni rade, a mi nećemo glasati za njihov rad i pravdati to. To nije sportski, prije svega, nije kolegijalno.“*

*Kemal Bratić, općinski načelnik: „ Inicijativa koju je uvažena vijećnica Emira predložila tiče se teme i tiče se onoga o čemu sada trebamo najviše razmišljati i ona je donekle po meni „opravdana“. Isto tvrdim ovo što Izet kaže, svakodnevno razgovaram sa ljudima koji su to prebolovali i smatram da je naš Dom zdravlja među prva tri na Kantonu u pružanju usluga kada se radi o pacijentima od COVID-a 19. Posebno bih tu istaknuo Hitnu pomoć koji su na prvoj liniji i koji daju najviše i svog vremena i svog truda i evo rizikuju na neki način, da tako kažem. Ako niste znali čini mi se da su juče oformljena dva COVID tima na blizu 11.000 stanovnika. Da li to ima u nekim općinama našeg ranga, ja ne znam. Uvijek smo nešto nezadovoljni sa Domom zdravlja, a kada odemo u Tuzlu manji smo od makova zrna i čekamo po 8 sati. Niko mi od ovih*

*što su bili pozitivni nije rekao da je nezadovoljan uslugama naših ljekara i našeg medicinskog osoblja u ovom periodu. Smatram i imam povjerenje u te ljude koji gore rade da oni znaju i da će oni ocjenjivati. Nisam još čuo da je neko pozvao, ovo što Izet kaže, da naš medicinar i ljekar nije otišao. Imamo jednu logiku, ima ovdje medicinskog osoblja i medicinskih radnika, oni ljudi koji su kod kuće nisu u takvom stanju da im treba njega ljekara ili medicinskog tehničara. Oni koji su, da kažem, u težem stanju, oni su na klinici i smješteni su gore. Iako je tema dobra mislim da je možemo usvojiti, ali kako je provesti. O vladama neću govoriti. Ja mogu sada predložiti ovdje inicijativu i ona će proći, reći ću nekom od vijećnika, jer nisam vijećnik, da mi kupimo helikopter i da Vijeće izglasa da se zaduže tri vijećnika da se kupi helikopter, a ne možemo to uraditi. Znači veoma je lahko pokrenuti inicijativu i veoma je lahko osmisliti. Ne ponižavam ničiju inicijativu, ali moramo gledati realno stanje. Šta je sada najveći prioritet? Najveći prioritet je da sačuvamo žive glave, kako nas tako i naših građana. Zato sam imao potrebu da dodam ovo za kolegicu Emiru i da vas upoznam da imamo dva tima sa dva ljekara. Juče smo imali pregled oko 40 pacijenata, a prekjuche 30, što znači pogoršava se stanje u regiji. Što se mene tiče kao načelnika sva ulaganja na općini će biti ad akta dok ne vidimo za ovaj mjesec dva kako ćemo izaći. Ni jedan jedini fening neće ići ni u šta, jer moramo imati operativna sredstva za ne daj Bože, da tako kažem, jer nam to treba svima biti prirotet.“*

*Emira Karić, predsjednica kluba vijećnika SDP: „ Ja smatram, pa ću opet pojasniti, da ste otišli u krivom smjeru sa ovom inicijativom. Ima ljudi koji imaju naprednije ideje pokušavajući ići korak ispred određenih problema, a ne doći i pasti ispod afričkih zemalja kada je u pitanju plan vakcinacije. Ova inicijativa je korak ispred određenih problema i smatram lično, posmatrajući i čitajući itd. da će ovaj treći val, po meni, biti itekako teži u odnosu na prethodni period. Kada sam razmišljala kako prevazići te probleme, a spustit ću se na nivo Doboj Istoka, došla sam na ideju COVID patronažnog tima. Reći ću i zašto. Najvažniji zadatak po meni bi bio mjerenje kisika u krvi oboljelim pacijentima koji leže kod kuće. Ta radnja itekako može spasiti nečiji život. Pacijenti ne moraju imati problema, a da imaju problema sa nivoom kisika u krvi. Ja sada neću baratati koji je to iznos, ali taj patronažni tim može uočiti određene probleme, poslati pacijenta na dalju obradu, u bolnicu itd. i po meni možemo spasiti nečiji život. Kada ste govorili da nema problema na općini Doboj Istok ja ovdje zaista neću iznositi imena i prezimena, ali mogu iznositi broj gdje su se ovakve vrste tražile kao privatne usluge i plaćale. Određeni medicinari dolaze kući pacijentima, ali plaćaju se kao privatne usluge. Ja smatram da ovo nije veliki materijalni izdatak, to su medicinski tehničari koji bi se možda povukli ili zamijenili za neke druge. Ja o tim stvarima ne raspravljam zato što ima direktor Doma zdravlja koji bi mogao bilo šta učinkovito uraditi u naredna tri mjeseca za koja ja smatram da ako prevaziđemo idemo prema nekim boljim vremenima.“*

*Kemal Skopljak, vijećnik BPS – Sefer Halilović: „ Načelnik je izašao nažalost, a htio sam se zahvaliti za lijepu riječ za rad Doma zdravlja u ovim teškim vremenima. Htio bih samo da pojasnim, vama kolega Izete i nekima kojima nije jasna ova inicijativa. Naime, meni je sasvim jasno šta je kolegica Emira htjela da postigne ovom inicijativom. Znači, sve je to u redu i sve mi to radimo, međutim suština je sljedeća: kada dođe do obolijevanja pacijenta od COVID-a i kada mu treba aplicirati terapiju taj pacijent dolazi ujutro i dolazi naveče u prostorije COVID ambulante, a to je u dijelu Hitne službe. Znači kada dolazi dva puta neko je obavezan da ga dovozi i odvozi. Ovdje se radi o prekidanju lanca da taj čovjek ne dolazi u kontakt sa više ljudi. Taj COVID patronažni tim bi imao funkciju da obilazi sve pacijente i da medicinar koji je u COVID-u aplicira terapiju u stanu, odnosno kući pacijenta, tako da pacijent nema potrebe da hoda po Doboj Istoku. To je suština ove inicijative. Svi su pacijenti dobili terapiju i obrađeni su i to je u redu. To je uglavnom radila Hitna služba sa svojim dobrovoljcima koji su izlazili izvan hitne i radili te stvari, ali ako bi napravili ovaj tim to bi rasteretilo rad Hitne službe i COVID ambulante koja radi pri hitnoj službi. Odvojio bi se jedan ljekar i jedan medicinar ili dva i suština je u tome.“*

*Izet Hodžić, zamjenik predsjedavajućeg Općinskog vijeća: „Izgleda da nisam poznavao tih zdravstvenih prilika i ne pratim događanja u Bosni i Hercegovini, Federaciji, na Kantonu, u čitavom svijetu. Neko hoće da ima pravo i kažem ja uvažavam svačiju diskusiju. Imamo problema kolega, dobro bi to znate, ako vam ne smeta da nazovem Kemala kolega, i znamo kakva je situacija što se tiče kadra u Domu zdravlja Doboj Istok. Pratim vijesti i imam kontakte sa svojim kolegama u određenom broju općina na Tuzlanskom kantonu. Imate pravo na svoje mišljenje, ali ja ne znam da li u drugim sredinama postoji, ja nisam čuo, ovakvi patronažni COVID timovi. Ljudi se bore da pruže adekvatnu pomoć stacionarnu u zdravstvenim ustanovama. Ovo je izuzetno dobra ideja, ali ja vam kažem ono što ja znam, a ne znam šta je iza brda. Koleginica Emira je u pravu 100%, ja ako želim da mi dođe medicinar da mi uključi infuziju u 21 sat, sada ne može zbog policijskog sata, navodim ime evo npr. Kemal Skopljak, u vrijeme kada on ne radi i normalno je da to treba i platiti. Znači to je moja lična odluka, nije me prisilio sistem. To je moja lična odluka, neću ja ići u COVID ambulantu, hoću da primim to, a ljekar je procijenio da ja mogu doći u COVID ambulatu. U tom je razlika što mi jednu stvar ne želimo da kažemo, gdje su nam ljudski resursi. Ja znam pouzdano, sinoć sam pričao sa čovjekom iz druge ustanove, da Doboj Istok nema, doduše muških, medicinskih tehničara na Birou za zapošljavanje, općina Doboj i općina Gračanica. Gdje su nam resursi za tako nešto? Hoćemo li zanemariti pružanje usluga Hitne pomoći? Ja danas u tom patronažnom timu imam tri intervencije i gdje ću ja poslije. Kažem vam pružaju se te usluge od procjene ljekara i ljekar koji radi u COVID timu vrši procjenu da li osobi x iz Klokočnice treba otići na kućnu adresu i svjedoci smo da se ide svakodnevno. Isto kao da li treba da ide u Tuzlu gore na bolničko liječenje ili je dovoljno kućno liječenje. Ako smo mi prva općina s tim patronažnim COVID timom, super, jer nisam čuo da ima u drugim sredinama. Vi ne slušate, ja sam rekao da je super, a vi odmah kontru. Ja kažem ako smo prva općina, citiram ne parafraziram, znači super. Ako super nije dobro onda...“*

*Kemal Bratić, općinski načelnik: „Zaboravio sam jednu veoma bitnu stvar. Ja to ovako doživljam. Imamo ljude koji rade godinu dana i koji izlažu svoj život opasnosti da nas spase i trebaju nas spasiti ako smo se mi pridržavali mjera koje nam je neko naložio. Mi smo danas trebali najviše da pričamo o tome kako da natjeramo ljude da se pridržavaju mjera, kako da natjeramo ugostitelje da ljudi ne sjede jedni uz druge, kako da natjeramo tamo za 8. mart šta je bilo i ovo nas možda stiže 8. mart u kompletnoj Bosni i Hercegovini. To je veoma bitna stvar. Mi smo ljude podrobili za godinu dana, ove medicinare i ono što bih vas ja zamolio dajte da svako od nas utiče na svoje komšije, na svoje prijatelje i na svoju rodbinu da se pridržavamo mjera. Evo današnje stanje 12 je pozitivnih i nije dugo bilo ovoliko u Doboj Istoku. Vama za informaciju imamo i dva uposlenika Općine Doboj Istok i zato su meni neke inicijative smiješne. Mi se borimo ovamo sa drugim stvarima i sve stavljamo ad akta, a ovdje evo gubimo sat vremena. Ja imam poslije ove sjednice, planirao sam da ćemo do 12 završiti, imam Štab civilne zaštite. Dajte da budemo realni. Isto kao da žive u nekom drugom prostoru, pojedini ovdje prisutni. Znači jesam za svaku dobru inicijativu, ali je li ona izvodljiva? Hoćemo li ove ljude da uništimo? Mogu li to oni izvesti? Ne mogu. Ja odgovorno tvrdim da ne mogu, jer znam. Neka im izbaci dvoje ljude haos je gore. Podvlačim predsjedavajući, molim vas da jedan od zaključaka bude da utičemo. Dobro je pa nam je u školama dobro stanje, vjerovatno se pridržavaju mjera i to nam je najbitnije sada dok ove vakcine ne dođu.“*

*Nusret Dautović, vijećnik SDA: „Želim da poselamim i pozdravim sve prisutne. Ova tematika i ja bih i jednu i drugu inicijativu podržao. Mislim na inicijativu vezano za mezarluke, vodu, česme i smeće, ali mi se ne sviđa obrazloženje ni jedne ni druge inicijative. Inicijativa je ok i svi znamo ko se brine o tome, mislim da se ne brine Općinsko vijeće i možemo bez veze raspravljati, jer džematski odbori se brinu za te mezarluke i mislim da su poprilično uređeni. Vezano za inicijativu za patronažni tim ja mislim da nema na Kantonu niko patronažni tim, jer ovdje je patronažni tim Služba hitne pomoći i to kolega Kemal Skopljak zna. Mene čudi zašto nije reagovao Kemal Skopljak, jer mi se čini da tamo u obrazloženju stoji da rasteretimo timove sa*



ovim patronažnim timom. Ako ćemo iskreno, ovdje smo ja i Kemal, nemaju se šta rasteretiti timovi, tu bi se rasteretila Služba hitne medicinske pomoći, jer jedino Služba hitne medicinske pomoći cijelo vrijeme devera sa pacijentima sa koronom i to znači da su cijelo vrijeme na prvoj liniji. Javio sam se zbog toga što sam dobacio, malo je nekulturno, kada je Kemal Skopljak bio, rekao sam i reći ću i ovdje da li bi taj patronažni tim bio 24 sata. Ne znam šta znači patronažni tim od 7 – 3 i to mogu pokriti dvije medicinske sestre i dva medicinara, ali šta ako zahtijevamo patronažni tim 24 sata i to je četiri smjene po dva čovjeka, to je 8 ljudi i vozača uz to. Mislim da u ovom trenutku znajući, jer sam u toj situaciji, osim ljudi koji su sada trenutno u hitnoj medicinskoj pomoći nema ko odgovoriti tom zadatku. Vjerovatno bi bilo tumbanja ako bi taj patronažni tim bio, jer jedino oni izlaze na teren. Neka mi kaže neko da nije Služba hitne medicinske pomoći izašla, učinila uslugu, da li to bilo uključivanje infuzija ili davanje injekcija, da li dovoženje, jer naš pacijent koji god je ugrožen on nije otišao sa svojim autom prema klinici. Jednostavno mi smo opterećeni i to je sigurno i to Kemal Skopljak može potvrditi, jer isto to radi. Zato kažem ja ću podržati inicijativu i jednu i drugu, jer sam i ja za korpe za smeće, da česma bude i da budu uredni mezarluci, ali neću tamo da slušam obrazloženja koja nisu dobro definisana. Isto tako čini mi se da stoji u obrazloženju da bi se pomoglo timovima, a treba poznavati gore situaciju. Situacija je da je 12 ljudi pozitivno, a juče sam ja odnio 20 testova gore i to je skoro 60 % pozitivno od jučerašnjeg dana. Vjerovatno će biti sa tendencijom rasta i ja nemam ništa protiv toga da nama neko upre, ali ko će nam uprijeti pitanje je. Vjerujte da medicinari sa biroa, ja nisam medicinar, ali radim pri toj službi, vozim i mislim da medicinari koji dolaze sa biroa nisu spremni odgovoriti tom zadatku. Kemal Skopljak je iz te struke i ok je i mislim da patronažni tim treba 24 sata i to je 8 – 9 ljudi, odnosno 4 vozača i 8 medicinara, jer šta vrijedi od 7 – 3, a mi to sve stižemo. Vjerovatno će biti još žešće i što se tiče inicijativa, ja ne mogu gubiti duše, podržavam, jer bit će situacija još teža u budućem vremenu.“

*Emira Karić, predsjednica kluba vijećnika SDP: „ Ja pristajem i na ovo ne morate podržati inicijativu de je prepisite. Ne morate podržati inicijativu nego je ovako odnesite direktoru i da on o tome raspravlja. Ulazite u forme onoga što treba da radi direktor. Da li će biti 4, 8 ili 15, da li će ti medicinski radnici ići u porodičnu ili iz porodične to je ljudi stvar direktora. Smatram da je ova inicijativa itekako dobra i opet govorim, a obraćam se sada kolegi Izetu koji kaže ja ako hoću infuziju pozovem. Da, neću imenom i prezimenom, čovjek koji je obolio od kovida, otišao je prema bolnici, bolnica ga vratila i rekla da mora na kisik kući. Morao se neko naći privatno, jer ne može supruga tog bolesnika da uradi, da se brine o tim nivoima ili šta, nije edukovana. Porodica je našla privatno osobu koja dolazi, a da li se plaća ili ne plaća u te vode neću da idem. Smatram da bi itekako bilo produktivno, ako ne dva onda četiri medicinska radnika koji se povuku sa biroa, nema javnog konkursa, a da li će on ići u porodičnu, a ovi iz porodične ovamo to nas nije briga, odnosno o tome neka brine direktor koji je zadužen.“*

*Hasan Hasančević, predsjednik kluba vijećnika SDA, je zatražio 5 minuta pauze prije izjašnjavanja.*

*Predsjedavajući je dao pauzu od 5 minuta.*

*Sjednica je nastavljena u 11,10 sati.*

*Selmin Karić, predsjedavajući Općinskog vijeća: „ Obzirom da nema više prijavljenih diskutanata prva vijećnička inicijativa:*

*Ova inicijativa se odnosi na formiranje COVID patronažnog tima pri JZU Dom zdravlja Doboj Istok na period od naredna tri mjeseca. Ovaj tim bi obilazio COVID pacijente sa jasnim zadacima. Na ovaj način bi se prije svega pomoglo zaraženim građanima Doboj Istoka, pomoglo ambulantom porodične medicine, te Službe hitne medicinske pomoći. Ono što je olakšavajuće kod realizacije ove inicijative je uredba Vlade TK po kojoj se mogu povući medicinski radnici sa biroa bez javnog konkursa. Ko je za ovu inicijativu?*

*Glasanje: ZA – 5, PROTIV – 0, SUZDRŽANIH – 11.  
Konstatujem da inicijativa nije dobila potrebnu većinu.*

*Senada Džanić, predsjednica kluba vijećnika SBB – BPS – SBiH: „Predsjedavajući, ispred kluba vijećnika SBB – BPS – SBiH tražim pojedinačno izjašnjanje.“*

*Selmin Karić, predsjedavajući Općinskog vijeća: „Znači izjašnjavamo se po inicijativi kolegice Emire i idemo po redu. Selmin Karić je suzdržan...“*

*Senada Džanić, predsjednica kluba vijećnika SBB – BPS – SBiH: „Ja sam tražila izjašnjanje po svojoj inicijativi.“*

*Selmin Karić, predsjedavajući Općinskog vijeća: „Kolegice, kada glasamo ako smatrate da nešto nije kako treba onda možete tražiti pojedinačno izjašnjanje. Znači ova inicijativa kolegice Emire nije dobila potrebnu većinu. Prelazimo na inicijativu kolegice Senade i čuli ste inicijativu da ne čitam ponovo. Ko je za ovu inicijativu?*

*Glasanje: ZA – 5, PROTIV – 2, SUZDRŽANIH – 9.*

*Konstatujem da inicijativa nije dobila potrebnu većinu.“*

*Senada Džanić, predsjednica kluba vijećnika SBB – BPS – SBiH: „Tražim da se pojedinačno izjasnimo.“*

*Selmin Karić, predsjedavajući Općinskog vijeća: „Koji je razlog?“*

*Senada Džanić, predsjednica kluba vijećnika SBB – BPS – SBiH: „Jednostavno želim da znam ko je kako glasao i to je stav kluba vijećnika SBB – BPS – SBiH.“*

*Selmin Karić, predsjedavajući Općinskog vijeća: „Morate imati razlog za pojedinačno izjašnjanje.“*

*Izet Hodžić, zamjenik predsjedavajućeg Općinskog vijeća: „U Poslovniku o radu piše da se mora dati obrazloženje zašto to predsjednik kluba traži.“*

*Senada Džanić, predsjednica kluba vijećnika SBB – BPS – SBiH: „Je li dovoljan razlog to što želim znati pojedinačno kako je ko glasao.“*

*Selmin Karić, predsjedavajući Općinskog vijeća: „Nije. Ako vam nešto nije jasno morate imati obrazloženje zašto to tražite. Je li imate obrazloženje?“*

*Senada Džanić, predsjednica kluba vijećnika SBB – BPS – SBiH: „Nemam riječi.“*

*Selmin Karić, predsjedavajući Općinskog vijeća: „Zahvaljujem. Znači inicijativa nije dobila potrebnu većinu.“*

### **USVAJANJE DNEVNOG REDA**

*Selmin Karić, predsjedavajući Općinskog vijeća: „Za današnju 5. redovnu sjednicu VII saziva Općinskog vijeća Doboj Istok predlažen je sljedeći dnevni red:*

- 1. Razmatranje i usvajanje Odluke o raspisivanju izbora za organe mjesnih zajednica na području općine Doboj Istok,*
- 2. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici,*

3. Razmatranje i usvajanje prijedloga Odluke o učešću u sufinansiranju nabavke Endoskopskog stuba,
4. Razmatranje i usvajanje prijedloga Odluke o visini prosječne konačne građevinske cijene 1 m<sup>2</sup> korisne površine građevinskog objekta na području općine Doboj Istok za 2021. godinu,
5. Razmatranje i usvajanje Izvještaja o radu Općinskog načelnika za 2020. godinu,
6. Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom,
7. Razmatranje i usvajanje Informacije o provedenim aktivnostima povodom obilježavanja Dana općine Doboj Istok.

*Otvaram diskusiju po dnevnom redu.“*

*Emira Karić, predsjednica kluba vijećnika SDP: „Gospodine predsjedavajući, ja predlažem da se tačka broj 2. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici skine sa dnevnog reda. Smatram da nije upitno skidanje ove tačke sa dnevnog reda, a naravno da ću i obrazložiti. Ova Odluka o utvrđivanju javnog interesa za izgradnju sportske dvorane u Maloj Brijesnici sadrži stav 1. koji glasi: Utvrđuje se javni interes za izgradnju sportske dvorane na parceli k.č. broj: 1049/2 zv. „Kratina“ ostalo neplodno zemljište površine 2068 m<sup>2</sup> upisana u zk. uložak broj: 2861 K.O. Mala Brijesnica na općini Doboj Istok sa dijelom 1/1. Ovaj stav sadrži novo stanje vlasništva ove parcele što nije u skladu sa zakonom. Na osnovu člana 153. Zakona o premjeru i katastru nekretnina koji glasi: protiv rješenja općinske uprave za geodetske poslove i katastar nekretnina o dozvoli upisa prava može se u roku od 15 dana od dana dostavljanja izjaviti žalba Federalnoj upravi za geodetske i imovinsko pravne poslove. JU OŠ „Brijesnica“ je poslala žalbu ovoj Federalnoj upravi i time je žalbeni proces u toku. Kada je žalbeni proces u toku stav 1. nije stvaran u ovoj Odluci. Moramo sačekati žalbeni proces, odnosno odluku na žalbu i onda ukoliko bude istovjetna ova odluka da je stavimo na dnevni red Općinskog vijeća, a ukoliko ne o tome se odlučuje u narednom periodu.“*

*Izet Hodžić, zamjenik predsjedavajućeg Općinskog vijeća: „Ja imam jedan konstruktivan prijedlog i očekujem podršku. Predlažem da tačka broj 6. dnevnog reda Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom bude tačka broj 1. a ostale tačke da idu hronološkim redom kao i što jesu u prijedlogu dnevnog reda. Ja znam i član sam Kolegija Općinskog vijeća koji je donio ovakav prijedlog dnevnog reda za ovu 5. sjednicu, ali zbog naših gostiju i poštivajući epidemiološke mjere ne vidim razloga zašto to ne bi uradili da ova tačka bude broj 1. da završimo sa njom i da se zahvalimo predsjednicima, odnosno predstavnicima udruženja građana koji su tu i koji treba da budu prisutni. Što se tiče ovog Emirinog prijedloga mislim da će se voditi rasprava.“*

*Selmin Karić, predsjedavajući Općinskog vijeća: „Znači predlažem sljedeći dnevni red:*

1. Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom,
2. Razmatranje i usvajanje Odluke o raspisivanju izbora za organe mjesnih zajednica na području općine Doboj Istok,
3. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici,
4. Razmatranje i usvajanje prijedloga Odluke o učešću u sufinansiranju nabavke Endoskopskog stuba,
5. Razmatranje i usvajanje prijedloga Odluke o visini prosječne konačne građevinske cijene 1 m<sup>2</sup> korisne površine građevinskog objekta na području općine Doboj Istok za 2021. godinu,
6. Razmatranje i usvajanje Izvještaja o radu Općinskog načelnika za 2020. godinu,
7. Razmatranje i usvajanje Informacije o provedenim aktivnostima povodom obilježavanja Dana općine Doboj Istok.

*Ko je za ovakav dnevni red?“*

*Emira Karić, predsjednica kluba vijećnika SDP: „Izvinjavam se predsjedavajući, trebali ste prvo staviti na glasanje prijedlog da se skine tačka dnevnog reda.“*

*Selmin Karić, predsjedavajući Općinskog vijeća: „Prijedlog Emire da se tačka 3. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici skine sa dnevnog reda. Ko je za?“*

*Glasanje: ZA – 5, PROTIV – 3, SUZDRŽANIH – 8.*

*Prijedlog nije dobio potrebnu većinu.*

*Prijedlog Izeta Hodžića da tačka 6. Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom bude tačka 1. a ostale da se pomijeraju za jedno mjesto. Ko je za?“*

*Glasanje: ZA – 15, PROTIV – 1, SUZDRŽANIH – 0.*

*Predlažem sljedeći dnevni red:*

- 1. Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom,*
- 2. Razmatranje i usvajanje Odluke o raspisivanju izbora za organe mjesnih zajednica na području općine Doboj Istok,*
- 3. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici,*
- 4. Razmatranje i usvajanje prijedloga Odluke o učešću u sufinansiranju nabavke Endoskopskog stuba,*
- 5. Razmatranje i usvajanje prijedloga Odluke o visini prosječne konačne građevinske cijene 1 m<sup>2</sup> korisne površine građevinskog objekta na području općine Doboj Istok za 2021. godinu,*
- 6. Razmatranje i usvajanje Izvještaja o radu Općinskog načelnika za 2020. godinu,*
- 7. Razmatranje i usvajanje Informacije o provedenim aktivnostima povodom obilježavanja Dana općine Doboj Istok.*

*Ko je za?“*

*Glasanje: ZA – 12, PROTIV – 3, SUZDRŽANIH – 1.*

### **REALIZACIJA DNEVNOG REDA**

***Ad. 1. Razmatranje i usvajanje Izvještaja udruženja građana o utrošku dodijeljenih budžetskih sredstava za 2020. godinu sa završnim računom.***

*Selmin Karić, predsjedavajući Općinskog vijeća: „Tačku dajem na diskusiju.“*

*Hasan Hasančević, predsjednik kluba vijećnika SDA: „Želim svim predsjednicima udruženja da se zahvalim za rad i doprinos u razvoju općine Doboj Istok i kvalitetnijem životu stanovnika općine Doboj Istok.“*

*Izet Hodžić, zamjenik predsjedavajućeg Općinskog vijeća: „Ja želim samo jednu opasku i opet kažem ne želim da budem krivo shvaćen. Izvještaj koji smo dobili na mejl, ja sam u stvari dobio na mejl, a vjerovatno je ovdje na hastalu u materijalima, od BZK „Preporod“ i tamo je predsjednik tog udruženja naveo da zbog nedostatka materijalnih sredstava nije rađen završni račun. Napominjem da je obaveza svih korisnika da li koristili budžetska sredstva ili ne koristili da urade završni račun. Ovo je najdobronamjernija sugestija, ako sam ja dobro razumio. Sinoć*

*sam čitao taj izvještaj, tako piše, ovo parafraziram i kaže zbog nedostatka materijalnih sredstava nisu bili u mogućnosti uraditi završni račun. To zakon ne poznaje i to je najdobronamjernija kritika prema ovom udruženju.“*

*Selmin Karić, predsjedavajući Općinskog vijeća: „Komisija za budžet, finansije, privredu i dijasporu je 23.03. održala sastanak i između ostalog tačka dnevnog reda je bila i Razmatranje Izvještaja udruženja građana o utrošku dodijeljenih budžetskih sredstava za 2020. godinu i Komisija je prihvatila izvještaje ovakve kakvi jesu s tim da udruženja koja nisu bila dostavila da dostave do naredne sjednice, ali svi su u međuvremenu dostavili ove izvještaje. Jedan od zaključaka komisije je bio da udruženja građana ubuduće izvještaje o utrošku sredstava dostavljaju i u narativnom obliku što je i bila obaveza, ali neki jesu a neki nisu i evo da se zaduži služba da napravi jedan urnek tog izvještaja kako bi trebao izgledati pa da sva udruženja u narednom periodu dostavljaju na tom urneku svoje izvještaje.“*

*Asim Hodžić, predsjednik Organizacije demobilisanih boraca općine Doboj Istok: „Poštovani predsjedavajući, uvaženi vijećnici želim da vas pozdravim i poselamim. Ja ću ispred udruženja boraca da vam prenesem selame i da vam kažem da mi je drago što je Hasan Hasančević izašao odmah na početku i rekao da nam čestita na angažmanu i radu, ali očito se ne vrednuje ovaj rad. Udruženje boraca je nekada bilo 500 KM mjesečno, sada se daje 400 KM i tih 400 ne daje se redovno, jer svake godine ostaju 2 – 3 tranše koje se ne isplate, a mi imamo troškove struje i ostale dadžbine, a posebno da imamo da možemo otići na neke manifestacije na koje smo pozvani. Nema šanse da mi to možemo ispoštovati, ako idemo iz svog džepa. Prema tome mogli bi se više uvažavati da li to Vijeće ili načelnik ili ne znam ko bi to trebao, ali mislim da bi se trebao više uvažavati trud svih udruženja. Ova općina ne treba da postoji samo da bude općina, jer se neko trudio da ovu općinu stvori i sa ovom općinom da imaju udruženja, Sportski savez, kulturno umjetnička društva i svi prateći elementi. Ako se neko trudio da ovo napravi, nemojte da se neko trudi da to razruši. Udruženje će raditi dobrom voljom, kao i do sada što se dobrom voljom radi, jer da udruženja nisu postojala zakon o borcima ne bi još postojao. Prema tome moramo malo više obratiti pažnje, a da li je to Asim, možda se ne sviđa načelniku što je Asim, ne sviđa se ni meni što je načelnik načelnik, ali on je izabran, kao što Hasko kaže, voljom naroda, pa neka bude ja to poštujem, ali mora i on da poštuje što sam ja izabran i ne samo ja nego svi koji obnašaju takve funkcije. Morat ćemo se malo više uvažavati i ne bih volio da dođe do ovoga da se svađa, kao što gledam ovo. Inicijativa je inicijativa i ako je inicijativa da se gore održava mezarje, nije naredba. Provjeri se šta je, je li to to ili nije. Hoću da ti držim predavanje i ima da šutiš dok ja pričam. Hoću da kažem, ja sam dobio poziv Nusrete i neću da gubim vrijeme, ti si plaćen a ja sam ovdje džaba došao i sada trebam slušati čitavo vrijeme vaše ... Ovo je dobra inicijativa da mi budemo prvi i onda ti ja neću držati predavanje i neću slušati ovakve stvari. Zašto ja tebi ne bi držao predavanje, ko si ti? Je li ovo tvoja općina? Izađi, ne moraš me slušati. Što me moraš slušati, izađi. Šta si ti, ako si vijećnik, ja sam dobio riječ i hoću da pričam za ovom govornicom. Držim se dnevnog reda. Tražim da se uvažavamo međusobno, da me ne zadržavaš i ne gubiš moje slobodno vrijeme.“*

*Selmin Karić, predsjedavajući Općinskog vijeća: „Ne držiš se dnevnog reda. Imaš li šta vezano za pravdanje utroška budžetskih sredstava.“*

*Asim Hodžić, predsjednik Organizacije demobilisanih boraca općine Doboj Istok: „Ja o tome nemam šta, jer imate izvještaj, ja sam njega podnio. Govorim vam da se ne poštuje odluka koja je dogovorena da tranše trebaju biti izmirene. Znači svake godine ostaje nam se dužno i mi se ne možemo izdržavati takvim ponašanjem. Sa 3.200 KM neka svako udruženje nešto počne raditi, pa ćete vidjeti dokle ćemo doći. Ako hoćete da utušimo udruženja, de da ih utušimo i neka samo bude općina. Morate malo uvažavati određene stvari. Komisije za jednokratne novčane pomoći nema, a nemamo ni izvještaja od komisije za jednokratne novčane pomoći i ne znamo*

*kome se dodjeljuju, a kome ne dodjeljuju taj novac. Je li to nenormalno? Sastanka sa udruženjima boraca nema i evo u zadnje četiri godine nismo imali sa načelnikom susret uopće. Vi izaberete komisiju i ne tražite od komisije izvještaje šta su oni radili sa nama. Jesmo li imali sastanke? Jesu li neke realizacije bile? Zašto ne tražite? Ima ovdje starih vijećnika koji treba da razmišljaju o tome, a ne samo postavite komisiju i komisija dođe sa nama da razgovara, a vi ne uvažavate njeno mišljenje šta smo dogovorili na sastanku.“*

*Izet Hodžić, zamjenik predsjedavajućeg Općinskog vijeća: „Sve je dobro dok se vodi diskusija i dok se obraćamo jedni drugima ovdje, a ne da dvojica prisutnih vode priču. Svako treba da izađe za govornicu i da kaže, u stvari trebao bi da ima pravo da kaže ono što misli i da zastupa interese, a ako ne zna za neke stvari treba neko da mu sugeriše. Komisija za raspodjelu jednokratne pomoći, ja koliko znam, u sklopu Općinskog vijeća i u sklopu Općine ne postoji. Znači u sastavu Općinskog vijeća nije bila komisija, niti je ima u sastavu Općine. Načelnik iz svoje budžetske rezerve, koliko ja znam, raspolaže određenim sredstvima koja se donesu prilikom kreiranja općinskog budžeta i u skladu sa zakonskim propisima načelnik donosi odluku o dodjeli pomoći pojedincima, udruženjima i svim ostalim. Zastupam interes građana, zastupam interes boračke populacije i štitim interes ove institucije, jer je ovo institucija najbitnija na općini. Prilikom kreiranja budžeta i ne trebam ja sada pametovati nikome, svi smo dovoljno pametni kako se budžet donosi i na koji način. Općinsko vijeće u novembru na sjednici donosi nacrt budžeta koji se stavlja na javnu raspravu i na decembarskoj sjednici ide u formi prijedloga, pa usvajanje ili odbijanje. Ja sam otprilike prisutan skoro na svim javnim raspravama koje se vode ovdje i malo mi dođe pokrivo kada vidim ljude da reaguju, a jednostavno ne dođe i ne interveniše. Evo navest ću primjer Udruženje penzionera na svakoj javnoj raspravi je veoma aktivno i čak ih bude po 4 – 5 i imaju prijedloge za kreiranje budžeta, odnosno da se uvrste u budžet. Sada mi u martu, aprilu, junu pričamo o nekakvim povišicama ili bilo čemu. Znači kod kreiranja i ja ću biti veoma iskren, bilo koja javna rasprava tu svi mi nismo položili ispit, jer vodilo se veoma bitnih javnih rasprava na području općine, da ne budem kritikovan zbog odlaska sa teme. Znači veoma je bitno učešće svih korisnika sadašnjih i onih koji teže ka tome da povlače sredstva sa budžeta da učestvuju u toj javnoj raspravi i da tu iniciraju svoje prijedloge i to je to. Da li će doći do realizacije u 100% obimu budžeta, to zavisi od mnogih faktora. Evo situacija sa COVID-om od realnog sektora najviše zavisi, od prihoda, od protoka novčanih sredstava i svega ostalog.“*

*Selmin Karić, predsjedavajući Općinskog vijeća: „Ima li još prijavljenih? Nema. Ko je za ovu tačku?“*

*Glasanje: ZA – 16, PROTIV – 0, SUZDRŽANIH – 0.*

*Zahvaljujem se predstavnicima udruženja.*

***Ad.2. Razmatranje i usvajanje prijedloga Odluke o raspisivanju izbora za organe mjesnih zajednica na području općine Doboj Istok.***

*Selmin Karić, predsjedavajući Općinskog vijeća: „Tačku dajem na razmatranje. Ima li prijavljenih? Nema. Ko je za?“*

*Glasanje: ZA – 16, PROTIV – 0, SUZDRŽANIH – 0.*

***Ad.2. Razmatranje i usvajanje prijedloga Odluke o utvrđivanju javnog interesa za izgradnju sportske dvorane u Maloj Brijesnici.***

*Selmin Karić, predsjedavajući Općinskog vijeća: „Tačku dajem na diskusiju.“*

*Emira Karić, predsjednica kluba vijećnika SDP: „Ova tačka nije skinuta sa dnevnog reda i ja ću sada obrazložiti zašto ona ne bi trebala biti usvojena. Rješenje Službe za prostorno uređenje općine Doboj Istok, broj: 05-2776/21/1 od 10.03.2021. godine prvostepeni organ utvrdio je promjenom u kku broj 115 KO Mala Brijesnica na način da je parcelu k.č. broj 1049/2 ostalo neplodno zemljište površine 2068 m<sup>2</sup> bez pravnog osnova i bez saglasnosti ranijeg vlasnika i posjednika te parcele JU OŠ „Brijesnica“ Brijesnica Velika upisao na općinu Doboj Istok sa dijelom 1/1. U obrazloženju rješenja prvostepeni organ pozvao se na član 89. stav 2. i član 173. stav 2. Zakona o premjeru i katastru nekretnina Federacije BiH. Šef službe je tu i vi veoma dobro znate da su ovi zakoni, evo ja sam ga isčitala, kao i mnoge druge koji su slični ovim zakonima, preuzeti iz Socijalističke Republike Bosne i Hercegovine i iz Republike Bosne i Hercegovine. Tada šefe nisu postojali kantoni i nisu se mogli ovakvi parametri razmatrati kao što ste se vi pozvali na taj član 82. zakona. Tokom prvostepenog postupka prvostepeni organ nije pravilno utvrdio činjenično stanje u konkretnom slučaju, a ono se ogleda u što prije donošenjem navedenog rješenja organ nije utvrdio na osnovu čega je Općina Doboj Istok bila upisana kao vlasnik na predmetnoj parceli zajedno JU OŠ „Brijesnica“ Brijesnica Velika, a to je organ bio dužan utvrditi na osnovu istorijata navedene parcele po katastru kojeg je organ bio dužan prihvatiti po službenoj dužnosti i na osnovu istorijata po gruntu kojeg je organ bio dužan pribaviti od nadležnog suda u Gračanici što prvostepeno rješenje čini nepravilnim i nezakonitim. Prvostepeni organ nema stvarnu zakonsku nadležnost da mijenja vlasnika prava pravnih i fizičkih lica što u konkretnom slučaju prvostepeni organ ožalbenim rješenjem i uradilo što je suprotno Zakonu o upravnom postupku Federacije BiH. Povreda odredaba Zakona o upravnom postupku Federacije BiH se ogleda i u tome što je prvostepeni organ donio ožalbeno rješenje bez da je JU OŠ „Brijesnica“ Brijesnica Velika kao stranci omogućio aktivno učestvovanje u upravnom postupku. Stranka nije pozvana na uviđaj, na usmenu raspravu, organ joj nije omogućio da učestvuje aktivno u upravnom postupku radi zaštite svojih prava i interesa prvostepeno rješenje čini nepravilnim i nezakonitim. Treba posebno napomenuti da Općina Doboj Istok nikada nije bila vlasnik i posjednik predmetne parcele, niti postoji valjana isprava koja bi davala zakonski osnov da Općina Doboj Istok bude vlasnik predmetne parcele. Pravo općine Doboj Istok na svim parcelama navedenim u dispozitivu prvostepenog rješenja proizilazi iz Zakona o građevinskom zemljištu Federacije BiH što znači da za promjenu oblika svih parcela potrebno u skladu sa članom 25. Zakona o građevinskom zemljištu Federacije BiH saglasnost Općinskog vijeća Doboj Istok da Općina Doboj Istok u slučaju prodaje predmetne parcele ima pravo preče kupnje u skladu sa članom 19. Zakona o građevinskom zemljištu Federacije BiH. To znači da OŠ „Brijesnica“ Brijesnica Velika dužna prije prodaje navedene parcele koja se nalazi u zoni građevinskog zemljišta istu prvu ponuditi Općini Doboj Istok, pa tek onda izvršiti promet predmetne parcele na treća lica sve pod uslovom ako škola odluči da proda predmetnu parcelu. Dakle, Općina Doboj Istok nema nikakvih vlasničkih prava na predmetnoj parceli, niti ih je ikada imala u proteklom periodu, jer je upravo predmetna parcela koju prvostepeni organ nastoji oteti JU OŠ „Brijesnica“ Brijesnica Velika putem Službe za prostorno uređenje Općine Doboj Istok. Uvidom u zk izvadak od 17.03.2021. godine JU OŠ „Brijesnica“ Brijesnica Velika u C listu jasno je utvrđeno da je nosilac trajnog prava korištenja na predmetnoj parceli upravo JU OŠ „Brijesnica“ Brijesnica Velika, a ne Općina Doboj Istok. Trajno pravo korištenja u skladu sa Zakonom o stvarnim pravima Federacije BiH jednako je pravo vlasništva, pa je obaveza zemljišnog suda u Gračanici da po službenoj dužnosti ili na zahtjev JU OŠ „Brijesnica“ Brijesnica Velika izvrši upis prava vlasništva na parceli k.č. broj 1049/2 i 1049/1 KO Mala Brijesnica, kao i na svim ostalim parcelama navedenim u dispozitivu prvostepenog rješenja i na taj način da se briše upis Općine Doboj Istok. Evidentan je propust prvostepenog organa što na raspravu nije pozvao i općinskog pravobranioca općine Doboj Istok kao zakonskog zastupnika općine Doboj Istok kako bi dao mišljenje o prometu navedene nekretnine na Općinu Doboj Istok putem rješenja Službe za prostorno uređenje općina Doboj Istok broj: 05-2776/21/1 od 10.03.2021. godine što je zakonska obaveza, jer je Zakonom o pravobranilaštvu Tuzlanskog kantona jasno propisano da je u slučaju prometa nekretnine i pokretnih stvari čija ukupna vrijednost prelazi iznos od 2.000 KM*

*obavezno mišljenje pravobranilaštva što je izuzeto u konkretnom slučaju. Želimo posebno napomenuti da Općina Doboj Istok na predmetnoj parceli suprotno Zakonu o prostornom uređenju i građenju TK izvodi građevinske radove radi gradnje sportske dvorane čiji je investitor Općina Doboj Istok. Takođe se mogao pozvati na član 151. Zakona o premjeru katastra koji kaže: u rješenju kojim se dozvoljava upis prava na nekretnine moraju biti označeni katastarski i knjižni ulošci, podaci o licima u čiju korist se vrši upis, podaci o licima čija su prava ovim upisom prestala, nekretnine koje su predmet upisa, navođenje isprava na kojima se upis zasniva, kao i prava koja se upisuju sa njihovom bitnom sadržinom. Mogu i dalje i dalje navoditi još zakona, ali možete i dobiti ovu žalbu koju je uputila JU OŠ „Brijesnica“, a mogu reći i nešto što je fleksibilnije da pojasnimo stvari. Znači prekršili ste, a to ćemo u žalbenom procesu i da ... Ja sam morala navoditi zakone.“*

*Selmin Karić, predsjedavajući Općinskog vijeća: „Kolegice, to je žalba, a mi nismo prvostepeni organ.“*

*Emira Karić, predsjednica kluba vijećnika SDP: „ Nije žalba, ovo je diskusija kojom se vijećnici upoznaju šta je služba prekršila. Vi ako želite primite tu diskusiju, ako ne želite nemojte primiti. Dalje, zašto se dvorana gradila upravo na toj pareli? Reći ću vam zašto i bit ću konkretna i jasna. Zato što ste procijenili na milion KM. Prvobitna zamisao da dvorana zaista bude funkcionalna je da se radi u sklopu škole, da dijete ne napušta objekat i taj je projekat iznosio cirka 400.000 KM. Zašto ste bili ovako velikodušni? Opet ću se vratiti na vijećničku inicijativu ...“*

*Izet Hodžić, zamjenik predsjedavajućeg Općinskog vijeća: „Ko vi?“*

*Emira Karić, predsjednica kluba vijećnika SDP: „ Služba i Općina Doboj Istok, investitor.“*

*Selmin Karić, predsjedavajući Općinskog vijeća: „Šta ste vi?“*

*Emira Karić, predsjednica kluba vijećnika SDP: „ Ja sam općinski vijećnik. Hoćete da operete 700.000 KM za izbore. Ovdje ću sada da budem jasna i glasna. Ovo vam je prilika da operete novac putem tendera zakonski pravno i jasno. Ja sam htjela, sami ste predsjedavajući bili u toku, povući za 24 sata 100.000 KM. Ne može zato što ste čačkali tamo kako ste htjeli. Zato ćete odgovarati i zato završavam ovu diskusiju.“*

*Hasan Hasančević, predsjednik kluba vijećnika SDA: „Ja mislim da bi nama hafiz trebao da oduči kada ovdje dolazimo. Uvažena kolegice, da smo imali 70.000 za izbore ni jednog vijećnika ne bi bilo osim našeg. O čemu pričate vi? Vi ste bolesni po tom pitanju. Kakvih 700.000? Vi morate imati dokaze za ovo, jer ovo ulazi u zapisnik, ići ćete na sud. Mi kada smo polagali zakletvu dužni smo čuvati imovinu općine Doboj Istok, a ne ministarstva. Općina je država. Prvi stupanj države je općina, kolegice, pa tek onda ministarstvo koje je nastalo kao i Republika Srpska i Federacija, kao i sve ostalo. Općina je stub države i to da vam je jasno. Kvadrat zemlje neće otići više sa ove općine bilo kome dok ne kaže ovo Vijeće da je to interes. Opet ponavljam, zato vaše inicijative ne prolaze. Vas su građani birali da, šta? Da čuvate interes građana općine Doboj Istok, a ne Ministarstva za obrazovanje. Ne znam kakvim imenom bih ja to nazvao. Kao što Tito kaže, najgori je unutrašnji neprijatelj. O čemu vi pričate za ovom govornicom? Radite u osnovnoj školi i razumijem vas, ali mi nešto da otmemo školi... Ni jedna općina u BiH nije više uložila u školstvo od općine Doboj Istok. Ni jedna, uzmite procentualno, ni jedna sigurno. Vi tu iznosite neke podatke i zamajavate. Ja bih volio da cijeli Doboj Istok pročita zapisnik sa ove sjednice, svi građani, pa da onda cijene kako ko od nas radi i za čiji interes radi. Da li za interes ministarstva ili općine, a vi ste dobili 300 – 400 glasova građana Doboj Istoka, a ne kojekakvih Tuzlaka ili nekih drugih. Treba da vam je na čast što želite da umanjite vrijednost općine Doboj*



*Istok. Pravne zavrzlamе postoje na svim nivoima i one će se riješiti. Općina Doboj Istok ima pravobranioca, kanton ima pravobranioca, ima sud, katastar, službe, federalna uprava. Čitate nam ovdje mi, ko vi, ko mi? U toj žalbi koju čitate, ko mi? Pitam vas otvoreno. Čitate u žalbi, mi smo ti koji želimo da uništimo jednim dijelom općinu Doboj Istok oduzimanjem neke zemlje. Tako se ne radi.“*

*Kemal Bratić, općinski načelnik: „ Ja bih zamolio prije svega da dobro vagamo šta ćemo reći ovdje za govornicom. Nije vrijeme da dižemo tenzije, jer mi ovo djeluje kao da su za dva mjeseca izbori. U pravnu regulativu neću ulaziti, ali ono što znam jeste da je jedno pravo korištenja, a drugo vlasništva. Takođe znam da je doskora to zemljište vođeno na Simo Lukić. Čija je greška? Ne znam. Da li je služba dobro uradila? Služba je radila svoj posao. Sud je to uradio, nije služba donijela odluku, sud je donio i u katastru je uknjiženo. Hoću da kažem jednu poentu. Čije je zemljište? Da li je to vlasništvo ministarstva ili općine za mene kao građanina je maltene isto. Naravno ako bi se ja pitao, pa mi neko kaže hoćeš li da to bude u vlasništvu ministarstva ili općine, ja bih rekao naravno da bih volio da bude u vlasništvu općine, kao građanin općine Doboj Istok, kao čovjek koji je ovdje proveo svoje djetinstvo i školovanje i rat. Mislim da sam dao neki mali doprinos, da budem skroman, u razvoju i dobrim idejama. Ta dvorana, ne pravi je općina radi sebe, ne pravi je ni radi vas, pravi je tamo radi djece. Gdje je ona postavljena? Da smo je i gore postavili bila bi jedna grupacija koja bi rekla što ste ovdje. Mi smo takvi, nažalost. Trebamo biti realni i principijelni. Zašto je dole postavljena? Jedini pravi razlog je zato što je nekada bilvaktile urađena pretvorba zemljišta, izdata urbanistička itd. Nema drugog razloga. Ne postoji drugi razlog. To što se na kafama i na sijelima priča ili na stranačkim sastancima, to se može okačiti mačku o rep. Ovo je jedini razlog. Zašto smeta da ta dvorana bude tu, ja ne vidim razlog. Možda zato što nismo pitali neke vlasnike stranaka. Možda zato smeta. Evo ubuduće ćemo šta god budemo radili u Maloj Brijesnici pitat ćemo određenu grupaciju gdje to treba da bude i kako to treba da izgleda. Mi znamo u preizbornoj kampanji da je neko prijetio, da je neko dolazio da hoće da se obustave radovi, da će biti zaustavljeno i srušeno, svašta je bilo. Izbori su prošli, hajmo ljudi raditi. Hajmo se okrenuti stvarnim problemima koje imamo. Hajmo je napraviti. Čija će biti? To je najmanje bitno. Opet ponavljam. Ja sam građanin Doboj Istoka, nisam građanin ni Tuzle, ni Banovića, ni Srebrenika niti bilo koga drugog. Vratit ću se samo na jednu našu inicijativu, čini mi se baš da je od vijećnice Emire došla ili nekog drugog i nemojte zamjeriti ako sam pogriješio, da se postavi neki spomenik u školsko dvorište. Ne daju. U dvije rečenice odgovorili, ne može. Je li mi trebamo ulagati, a neko drugi da raspoláže. Ja mislim da ne trebamo. Da smo bogdom u prošlosti i neke druge stvari uradili na ovaj način, bili bi bolji i naša općina bi bila bogatija za jedan objekat. Kao što sada imamo tamo u Lukavici Rijeci područnu školu, kupili mi zemlju, izgradili je i evo vam koristite i šta nas briga za tu školu. Mi smo svoj cilj ostvarili. Napravili je, obezbijedili našim učenicima i neka je koristi ko god hoće. Hajmo povući vertikalnu, ovdje smo neki po 8 – 9 godina i ja vam odgovorno za ovom govornicom tvrdim da za ovih 8 – 9 godina Ministarstvo obrazovanja nije uložilo više od 200.000 KM u naše objekte, a znate šta smo sve mi uložili i šta smo sve uradili za naše i sportske i školske objekte. Molim vas da ne dobacujete, naučite se kulturi, pa onda tu sjedite. Je li se to neko pobrine kada ode neka peć u školi? Kome se prvo ide? Dolazi se ovdje. I kada treba nešto drugo, dolazi se ovdje. Zašto? Nemaju ljudi i neće. Ja bih volio da se to promijeni i da se o svemu tome brine onaj ko je nadležan da se brine. I za ovo u zdravstvu nadležno je Ministarstvo zdravlja, nadležan je Zavod zdravstvenog osiguranja, nadležan je Zavod za javno zdravstvo itd. Mi ovdje razbijamo glavu o inicijativama i gubimo sat vremena, a to je nečiji tuđi posao ne naš, ne moj kao načelnika i ne vas kao vijećnika. Da završimo, ne želim da moja diskusija izazove repliku, ali vaša diskusija, uvažena vijećnice Emira, je u najmanju ruku meni ličila kao nekog pravника iz Ministarstva obrazovanja Tuzlanskog kantona koji je ovdje došao da nama objasni zašto mi to trebamo tako, a ne trebamo ovako. Ovdje govorim da vi ne zastupate interes općine Doboj Istok, vi zastupate interes jedne političke partije, vi zastupate interes Ministarstva obrazovanja. Ja dok sam ovdje ja ću zastupati interes općine Doboj Istok i kvadrat zemlje ukoliko budemo mogli da to pređe na*

*Općinu, on će preći. Ako je sud donio nakaradnu odluku, a govorim vam da je sud donio tu odluku, nije služba i ako se ona ispravi, nama je opet dobro, jer ona će ostati tu, ne može je niko uprtiti pod ruku i odnijeti je na stranu. Ja vas molim dajte da ne gubimo vrijeme, jer imamo stvari o kojima se trebamo brinuti i posao nas čeka sve.“*

*Izet Hodžić, zamjenik predsjedavajućeg Općinskog vijeća: „Sve mislim evo tačke dnevnog reda i neću se javljati, jer dobro je radi se na našoj općini nešto, međutim i ako se radi izgleda da nekome ne odgovara, a ako se ne radi pogotovo ne odgovara. Moram malo hronološkim redom ići. Znači Kolegij Općinskog vijeća je prije 10 dana imao svoju sjednicu za pripremu ove sjednice Općinskog vijeća i kreirao je prijedlog dnevnog reda, a između ostalog i tačku o kojoj raspravljamo. Dnevni red, čini mi se, da su jednoglasno svi prisutni članovi Kolegija Općinskog vijeća donijeli i izglasali i malo su mi poslije toga čudne ove reakcije.“*

*Emira Karić, predsjednica kluba vijećnika SDP: „Ja sam bila suzdržana.“*

*Izet Hodžić, zamjenik predsjedavajućeg Općinskog vijeća: „Rekao sam čini mi se. Tačka je došla na dnevni red i ja sam dobio, vjerujem kao i svi prisutni, zapisnik sa Kolegija i mislio sam da pročitam ono što sam ja rekao vezano za ovu tačku dnevnog reda. Ne vidim apsolutno ništa loše u tome i argumentovano ću obrazložiti zašto općina, apostrofirat ću posebno općina, kao institucija, ne Kemal Bratić, ne Izet Hodžić, ne Selmin Karić, nego općina kao institucija, ne bi bila vlasnik predmetne parcele u Brijesnici Maloj. U diskusiji na Kolegiju sam naveo jedan razlog sa kojim sam ja bio upoznat, a bilo ih je više, u Klokočnici je trebalo postaviti spomen ploču na 50 m<sup>2</sup> i tražena je saglasnost od Ministarstva obrazovanja i nismo dobili saglasnost. Većina građana i privrednika, neću reći Klokočnice, nego Doboj Istoka i kažem općine Doboj Istok su uradili fiskalturnu dvoranu u Klokočnici i u Brijesnici Velikoj i sa njom raspolaže neko drugi. Ta sredstva od naplate rekreativaca idu u Ministarstvo za obrazovanje. Ja dozvoljavam da neko sasvim suprotno misli i da je to ok, ali to Ministarstvo treba da pošalje sutra učenicima i kredu i spužvu i papir za kopiranje i sve ostalo. Ja neću prihvatiti da je u redu da mi građani i privrednici, nije bitno ko, napravimo nešto, kupimo nešto i damo nekome drugom koji će gazdovati i raspolagati. Možda nemam neki koeficijent inteligencije nadprosječan da vidim šta je problem u tome. Evo donijeli smo za školu u Lukavici Rijeci da je Općina vlasnik te parcele i dato je OŠ „Klokočnica“ na korištenje bez ikakvih problema. Kao što kaže načelnik treba peć i Općini se obraća. Imam osjećaj da je nešto sasvim drugo u pitanju. Ne mogu ja sada ovdje predstavljati pravnu struku, a pravna struka uradila i stručna lica, koja su trebala to da provedu i urade, završila proces i da sada ja hoću da budem pop nad popom ili hodža nad hodžom. Koleginice Emira, preko ovog vam jednostavno ne mogu preći. Citiram vašu rečenicu i velikim slovima sam napisao: vi želite, a rekli ste svima nama prisutnim u sali, vi želite oprati 700.000 KM. Među ovim kojima ste se obratili bio sam i ja i preko toga jednostavno ne mogu preći. Nije vam korektno, jer to su krupne, veoma krupne riječi. Niste imenom i prezimenom nikoga izdvojili, rekli ste vi. Vi smo mi ovdje prisutni.“*

*Kemal Bratić, općinski načelnik: „Zaboravio sam da kažem da je dvorana rađena po projektu koji sam ja zatekao i nije bilo drugog projekta. Koliko ona vrijedi, ja zbilja ne znam. Ne znam joj tačnu ni stvarnu vrijednost. Daj Bože da imamo 4 miliona, pa da imamo jedan takav objekat od 4 miliona na području općine Doboj Istok. Čini mi se da je idejno rješenje radio Škrebo, a Began Babić je uradio projekat za sportsku dvoranu u Maloj Brijesnici. Kada sam prvi puta izabran za načelnika projekat još nije bio plaćen. Je li tako pomoćniče? Mi nemamo drugog projekta. Ko je dolazio na ideju da se ona negdje drugo gradi, trebao je uraditi projekat i neka dođu i kažu mi imamo projekat, Ministarstvo će platiti pretvorbu, Ministarstvo će platiti urbanističku, ništa od toga Ministarstvo nije platilo. Zašto? Ne interesuje ih.“*

*Selmin Karić, predsjedavajući Općinskog vijeća: „Ja ću se nadovezati na ovo načelnikovo. Projekat je urađen negdje 2010 – 2011. godine, ne znam ni ja tačno. Na taj projekat i lokaciju saglasnost je dalo i tadašnje vijeće, odnosno Savjet Mjesne zajednice Mala Brijesnica u kome su kolegice bili i članovi SDP. Zašto je neko nakon nekog vremena promijenio mišljenje, to je njegov problem. Znači tadašnji savjet mjesne zajednice je dao saglasnost i na projekat i na lokaciju za izgradnju te sportske dvorane i ona će se, ako Bog da, tu i izgraditi.“*

*Emira Karić, predsjednica kluba vijećnika SDP: „ Ja sam prije svega građanin Bosne i Hercegovine, veliki patriota i poštovalac slova zakona. I na Kolegiju sam rekla samo prema zakonu i samo prema zakonu. Zato insistiram bez ti, vi, oni itd. nego kao osoba koja sam poštovalac slova zakona. Ako zakon kaže da ta parcela može pripasti općini, neka pripada općini, a onda vam ne treba upotrebna dozvola i saglasnost za urbanističku od direktora. Ne znam zašto ste tražili od direktora, jer bi i on prekršio jednu normu, jer je trebao staviti na školski odbor, a nije, nego su samo došli i podvalili mu da potpiše saglasnost za urbanističku dozvolu bez da je konsultovao školski odbor, jer školski odbor to možda ne bi i to je tačno itd. Zašto insistiram ovdje čija je? Neki je djed i pradjed rekao ovo zemljište dajem školi da djeca ne idu u Boljanić, čini mi se, to je rekla kazala. Zato insistiram ja, ako je to školsko i ako je taj pradjed ostavio školi, neka tako i bude prema zakonu. Zašto ste insistirali na toj lokaciji? Niste uopšte dobili ni stav školskog odbora, ja sam bila u tom školskom odboru i mi smo čak hajde da pošaljemo da bude neka komisija, pa da se usaglasimo, a vi ste se oglušili na to. Nemam ništa protiv da se pravi tu dvorana naravno, samo prema zakonu. Napravljena je dvorana i u Brijesnici Velikoj i ona ima velikih problema, nema upotrebnu dozvolu. Krim inspektorica je rekla direktore, vi ste odgovorni i po meni ključ u bravu dok se stvar ne riješi. Koliko je godina od kako se ova stvar rješava? Jako puno. Djeca nam ne mogu vršiti nastavu tjelesnog uplela se općina i zašto ja onda nemam pravo sumnjati u nečije namjere, odnosno namjere ove općine i vlasti u općini. Ja kada govorim vi, govorim o vlasti u općini, o većinskoj vlasti u općini. Mislim da se znamo na relaciji, jer i vi koristite mi, ti, oni itd. Vidjet ćemo odakle ćete dobiti, jer ne možete povući sredstva od ministarstva, to sam probala, ni od federalnog ni od kantonalnog, ako je parcela na općini. Vi tražite nekim transferima, kako se to već zove, pa ćemo vidjeti na koji način. Svršishodnija bi bila uz školu manja dvorana od 300 – 400.000 KM ako ste mislili zadovoljiti potrebe učenika Područne škole Brijesnica Mala, jer njih je 100 – 150, nekada je i 90, a nekada i 120. Djeca direktno izlaze, manja dvorana, lijepa za izvođenje, a ne ovaj niti znam je li megalomanski, niti je dobar, ne znam čemu služi, niti se mogu neke velike utakmice, niti bi bila skladna za školu. Kažem da se konsultovao školski odbor, ali ako je to vaša parcela vi nemate šta konsultovati školski odbor, ni direktora, ni nikoga, radite i hvala vam.“*

*Selmin Karić, predsjedavajući Općinskog vijeća: „Ono što sam ja vidio izvadak u A listu vlasnik Općina Doboj Istok. Meni je to dovoljno. Druga stvar mi donosimo Odluku o utvrđivanju javnog interesa za izgradnju sportske dvorane u Brijesnici Maloj na k.č. taj i taj. Da li će to sutra biti i ostati općina Doboj Istok vlasnik ili neće, mi utvrđujemo interes za izgradnju sportske dvorane.“*

*Hasan Hasančević, predsjednik kluba vijećnika SDA: „Sada bi trebali zatvoriti dvoranu u Brijesnici Velikoj. Zašto? Zato što direktor kome je dato na raspolaganje ne radi svoj dio posla. Zašto? Zato što direktor kao menadžer treba da podnese zahtjev za... Zašto? Za upotrebnu dozvolu. Je li tako kolegice? Da, pričate, a ne slušate. Zašto nije završeno? Zato što Ministarstvo nema sredstava da uplati u datom momentu 2000 za ovo, 1000 za ono i 500 KM. Nemojte kimati glavom, ja sam sudionik takvih stvari godinama. Onaj ko želi da upravlja, mora dati pare. Zašto Gračanica nema gradsku dvoranu? Zašto je zaustavljeno? Hoće ministarstvo, hoće onaj, a ne može, pare i idemo dalje. Ja bih volio da je u Maloj Brijesnici još veća dvorana, kao vijećnik, kao sportski radnik i da možemo neke sportske aktivnosti prebaciti i u Malu Brijesnicu, da djeca građana Male Brijesnice mogu bolje trenirati, da im je bliže i da su im uslovi bolji. Tako da ta*

*dvorana ako ispadne Ministarstvo, opet će od nas roditelja da se plaća sve, a mi je i napravili. Napravimo džamiju od 2 miliona Rijasetu, od milion Ministarstvu obrazovanja i sve podijelimo i ako ćemo klanjati da vas pitamo i ako ćemo igrati lopte da vas pitamo. Ako ćemo borba protiv droge za djecu i to treba platiti i sve trebamo platiti. Kada pričate o tehničkim stvarima morate imati argumente, kao što ste naučili ko pjesmicu napamet odozgo što vam je pripremljeno u Ministarstvu za obrazovanje, tako trebate napamet naučiti i ovo na lokalnom nivou ko podnosi zahtjev, molbu i sve te stvari, pa onda član taj i taj i zakon taj i taj i onda nas danas educirate kako se to radi.“*

*Emira Karić, predsjednica kluba vijećnika SDP: „Općina je stvarno velikodušna sa projektom od milion KM i to je zaista zaista i za medije i za široku javnu masu da čuje, a ovdje se gleda o nekim crkavicama o medicinskim radnicima koje treba povući, o nevladinom sektoru koji takođe dobiva crkavice, o našem paušalu. Ide na sljedeće Vijeće inicijativa o volonterskom radu u Vijeću, da ne budemo na crkavici, da budemo volonteri. Mislim da ste i vi nešto, kolega zamjeniče, nešto govorili u prethodnim diskusijama, pa da to bude i za dvoranu u Brijesnici Maloj. Ja ću podnijeti tu inicijativu da se oslobodimo i da sredstva idu i da izgradimo taj lijep projekat od milion KM.“*

*Senada Džanić, predsjednica kluba vijećnika SBB – BPS – SBiH: „Lijepo je da postoji dobra saradnja između škola i općine što kod nas u većini slučajeva i jest. Fino je da općina pomaže obrazovne institucije, jer potreba je uistinu bila. Drago mi je zbog početka izgradnje dvorane u Maloj Brijesnici, jer znam da će služiti svrsi. Želim da napomenem, a Hasan Hasančević će me vjerovatno prozvati poslije, da se nadam da će doći period da će i u Stanić Rijeci početi sportska dvorana. Ono što želim da kažem je naravno, kažem za sebe, da kada je nešto općinsko to je naše, građana Doboje Istoka. Naravno da mi trebamo težiti tome da možemo sve što smo u mogućnosti da to ostane ovdje u našoj vlasti i slažem se. Međutim, dolazim iz obrazovanja i Ministarstvo obrazovanja gledam kao drugu kuću. Ne slažem se da Ministarstvo obrazovanja ne ulaže u institucije, ne slažem se da ne vodi računa, niti da ih ne interesuje. Napomenut ću da je u periodu 2016 – 2020. godine, kada je ministar obrazovanja bio Zlatan Muratović, itekako su škole, a evo govorim konkretno objekti JU OŠ Klokočnica, imale pomoć Ministarstva obrazovanja i u kapitalnim izdacima i kroz sami rad, što nam uveliko doprinosi. Tako da sam sa te strane željela da kažem da to nije neka nebriga i moram ovdje na neki način u pozitivnom svjetlu, ono što je pozitivno u Ministarstvu obrazovanja i nauke izdvojiti.“*

*Kemal Bratić, općinski načelnik: „Ministar kojeg sam puno cijenio i sada je ministar za kulturu i mlade gospodin Zlatan je izuzetan čovjek i dobar prijatelj Doboje Istoka. Ja vas molim da kažete cifru, ja je znam, a znam i šta je općina Doboje Istok uložila. Imamo podršku, svi oni nama daju podršku i onaj ministar saobraćaja kada je bio kod vas, kada smo razgovarali, pa oko 50.000 za ovo ili ono, a nema ništa od toga. Znači ne možete pričati o nečemu što ja znam, a da ja ne izađem ovdje i da vas ne demantujem. Nije tačno da ministarstvo ne može ulagati ako je to zemljište općine Doboje Istok i to jedna ogromna laž. Ja ću vam to dokazati. Šta je ovdje poenta? Poenta je da se razvali projekat. Vjerujte, ne smijem se kladiti i ne volim se kladiti i ne kladim se, taj projekat o kojem vi govorite ne košta milion KM. Ne znam otkud vama cifera i zbilja ne znam otkud cifra. Dođite kod mene donijet ću vam ja projekat, pa ga pogledajte. Šta hoću da kažem, šta je poenta ili šta je ovo što se sada desilo. 2012. godine naši direktori škola, nemojte da se neko naljuti, su išli i tražili sadaku. To je tačno i to ne može niko reći da nije tačno i od privrednika i od općina i od roditelja itd. Zašto? Naša djeca nisu imala dobre uslove i sada trebamo u nekim školama, što ja znam, uraditi i popraviti stanje. Da kažem evo i nadam se da neće neko zloupotrijebiti, zapostavili smo dosta stvari, ulagali smo u to obrazovanje. Zašto? Jer smatramo da je to perspektiva. Ja se ne kajem i opet ćemo ulagati. Sada nam je došlo vrijeme da ulažemo u zdravlje, u objekte koje koriste zdravstveni radnici, jer imamo i tamo azbestnih krovova, imamo i tamo nekih stvari koje treba mijenjati. Smatram da se izgradnjom dvorane u Maloj Brijesnici zaokružuje potreba, a da li će biti još negdje dvorana, ja mislim da treba biti. Iskoristili*

*smo priliku kada smo gradili objekat u Lukavici Rijeci i stavili tamo jednu mini dvoranu koju djeca mogu koristiti, a da li je neko koristi rekreativno, ja ne znam i ne ulazim u to, to zna onaj koji gazduje. Nemojte pričati o nečemu što nije istina. Ja znam kada se radi o podacima koliko je ko uložio, koliko ministarstvo, ali je veći dio je uložila općina Doboj Istok. Kada se poredi sada neki drugi nivo i naši roditelji, naši roditelji su takođe dosta uložili i kroz sajmove i kroz donacije i kroz ono što se naplaćuje djeci, ne znam kako su to dogovorili, pa ima i nastavnica ako se ne radi 10 KM se odbija i to se vjerovatno troši ili trošilo u objekte. Znači za svaki problem prva adresa je općina Doboj Istok. Neću ovdje prozivati nikoga, jer to je naš zadatak, mi to trebamo i čak sam jednom javno na jednom sajmu rekao nemojte direktore više tražiti od roditelja, to je naš posao, posao općinske administracije i posao ministarstava koliko ko može i koliko ko hoće.“*

*Izet Hodžić, zamjenik predsjedavajućeg Općinskog vijeća: „Mi smo stručnjaci za zakomplikovati. Ovdje se radi o zgradi, odnosno objektu sportska dvorana ili fiskulturna ili školska dvorana i imamo prijedlog Odluke. U sastavu te Odluke imamo tri člana i ako šta nije jasno vezano za ta tri člana, jer svi mi zajedno najmanje raspravljamo o prijedlogu ove Odluke što je na dnevnom redu. Znači naznačena je parcela, piše šta je i kako je i u ovom momentu je tačka utvrđivanje javnog interesa za izgradnju sportske dvorane u Brijesnici Maloj. Ako nam šta nije jasno po ovoj Odluci valjda bi trebalo po tom pitanju da diskutujemo i to je to, jer odosmo mi u široko i šta se dešavalo prije 8,9 ili 10 godina. Ovdje je jasan prijedlog Odluke i prema tome ako budemo o svakoj tački ovako diskutovali morat ćemo tražiti pauzu.“*

*Senada Džanić, predsjednica kluba vijećnika SBB – BPS – SBiH: „Meni je stvarno žao što načelnik trenutno nije ovdje prisutan. Ja ću se osvrnuti na period 2012 – 2016. godina. Ja sam tada radila kao prosvjetni radnik i voljela bih, kao što načelnik kaže, da se naprave izdvajanja za školu „Klokotnica“ u tom periodu za sve objekte škole i da se naprave od 2016 – 2020. godine. Zašto ovo govorim? Ja nisam nikada ničiji rad prisvojila, niti hoću. To je bio jedan rad gdje su četiri objekta promijenila izgled. U Područnoj školi u Stanić Rijeci inicijalna kapisla je Ministarstvo obrazovanja i samo ja znam kako je bilo donijeti kapitalna ulaganja u Stanić Rijeku. Mi sada pričamo o odnosu Doboj Istok – Tuzla i nije mi bilo teško, vjerujte mi, dvadeset puta ako treba, dva puta u jednom danu, doći u Ministarstvo obrazovanja, objasniti situaciju koju ima Područna škola u Stanić Rijeci, sa čim se djeca susreću, u kakvim uslovima rade dok je odobreno prvih 20.000 KM. Sa tih 20.000 KM za školu, dignut je krov i krenulo se raditi. Nakon toga sljedeća investicija je bila 40.000 itd. Hoću da vam kažem da je škola zajedno sa Ministarstvom obrazovanja bila inicijator tih ulaganja. Ja čestitam svima onima i zahvalna sam roditeljima, našim privrednicima i građanima. Međutim, vjerujte mi ja sam sada direktorica Mješovite srednje škole Doboj Istok koja ima problema od temelja do krova, a ovdje kažemo da smo te probleme priveli kraju. Ima problem da trebamo zalijevati temelj, imamo problem da je krov lepenka i da se iz pokrovlja vidi u učionice, imamo problem da za pola škole nije bila urađena stolarija, podovi ne postoje nikako u toj školi, peć je dotrajala i pitamo se kada će stati, antifiz nije nasut, voda je još uvijek itd. Hvala Bogu ovo sa čim se susreće Mješovita srednja škola Doboj Istok je da ima više djece, nego što ima kapaciteta. Nedostaje zgrada, nedostaje zemljište, sala itd. Morala sam reći Zlatan Muratović nije samo dobar čovjek, Zlatan Muratović je veliki prijatelj škola i Doboj Istoka i još puno ljudi.“*

*Izet Hodžić, zamjenik predsjedavajućeg Općinskog vijeća: „Ja ću stvarno napustiti sjednicu Vijeća. Ovdje nije zakupljen termin ni za Ministarstvo ni za koga, ne pričamo o školi u Klokotnici, o dvorani u Klokotnici, ne pričamo o školi u Stanić Rijeci, pričamo o izgradnji sportske dvorane u Brijesnici Maloj i ja vas molim da se držimo tačke dnevnog reda. Znači ne tražim ovdje da se promoviše ni jedan ministar, zakupite termin, taman da dolazi iz moje političke opcije, na javnim servisima i promovišite ga.“*

*Nusret Dautović, vijećnik SDA: „Zamolio bih predsjedavajućeg da tačku privodi kraju i da se izjasnimo o ovome. Ja ne znam jesu li ovo tekuća pitanja, ako su tekuća pitanja ja bih vam rekao da meni Pire ore, pa ću vam reći da će Pire i frezati, jer dobro Pire freza, a možda ću i Idriza Škrebu da vidim. Ljudi ba ovdje nebuloze pričamo, nismo mi ovdje dvorske lude. O čemu pričamo? Džaferović je dobar, nije loš ni Genjac, de da vidimo šta ćemo sa Konakovićem. Ljudi šta je vama, ako se budemo igrali sjedit ćemo ovdje do 12 večeras. Predsjedavajući, ja bih vas zamolio nemojte dovoditi u pitanje našu inteligenciju.“*

*Hasan Hasančević, predsjednik kluba vijećnika SDA: „Ja hoću da ostane nešto istinito, uvažena kolegica direktorica Senada je ovdje kazala 20.000 prvi put od Ministarstva, a 40.000 drugi put. Samo bih vas zamolio da kažete da li je 20 ili 40.000 povrat od uplaćenih sredstava dvorane OŠ „Klokotnica“ koju su koristili građani općine Doboj Istok, odnosno mjesne zajednice Klokotnica? Koja je to cifra, da li je 20 ili 40.000? Meni je drago što je u Stanić Rijeci popravljena škola, ali imali smo ulaganja i mogli smo od tih sredstava i dvoranu dotjerati, ali nismo.“*

*Senada Džanić, predsjednica kluba vijećnika SBB – BPS – SBiH: „Često sam u Doboj Istoku čula tu priču. Nisam imala priliku i tako mi je drago što ste je postavili za govornicom. Sredstva od dvorane, napominjem da je rekao donijet će papir, ulagana su u potpuno drugom smjeru. Vi očigledno ne razumijete, kapitalna ulaganja Ministarstva obrazovanja nemaju veze sa salom, to su posebna vlastita sredstva škole. Mi smo ta sredstva koristili za razne namjene, ali ne u Stanić Rijeci. Nemojte molim vas pričati dezinformacije.“*

*Samir Džanić, vijećnik NLD: „Pošto prvi puta izlazim za govornicu ja bih sve da vas poselamim i pozdravim. Ja stvarno, slušajući ovo do sada sve i gledajući pojedine kolege i kolegice i ove replike i inicijative, mogu reći da ovo nema smisla. Ako ćemo mi ovdje biti čitav dan i pričati o jednom, a ne donijeti konkretan zaključak ja ne vidim svrhu ni smisla sjedenja ovdje i raspravljanja o jednoj te istoj stvari. Ako je to toliko važna stvar zašto to ne stavite pod jednu tačku dnevnog reda i da dođemo na vanrednu sjednicu i završimo tu tačku dnevnog reda. Ovako ćemo ostati do jutra izlazeći i replicirajući jedni drugima, a ništa napraviti nećemo.“*

*Refik Švalić, vijećnik SDA: „Obzirom da sam već jedanput izlazio nastojat ću biti maksimalno kratak pošto mi je kolega Džanić uzeo dosta riječi. Ja sam ovdje legalist i kao vijećnik, pošto nas raznih branši ima ovdje, kada glasam za nešto vidim na šta se poziva i to je za mene broj 1. Drugo, gradi se nešto na Doboj Istoku. Mi smo 90 % stvari iza rata radili nelegalno, pola Sarajeva je bez ikakve dokumentacije što se radilo poslije rata. Gradimo neko dobro za naše građane i to ne mogu shvatiti. Predsjedavajući morat ćete ubuduće usmjeravati, inicijative su ok i vijećnik ima pravo da podnosi inicijativu, ali po pitanju materijala, prekidati i oduzimati diskusiju onome koji iznosi ono što nije tema materijala o kojem raspravljamo. Ovdje fino kaže broj taj i taj i ako je meni neko dao nešto neregularno ili neki falsifikat ja ću se kao vijećnik koji sam glasao za nešto pozvati na to i ja ću se braniti sutra. Za mene je ovdje broj taj, k.č. taj i taj i vlasništvo 1/1, dajte ljudi mlatimo praznu slamu sat vremena. Prekinite ovo više inače ja neću prisustvovati sjednici.“*

*Haris Sinanović, vijećnik SDP: „Pozdravljam predsjedavajućeg, zamjenika, općinske vijećnike i načelnika. Ja ću izraziti svoje mišljenje vezano za ovu tačku i mislim da nema sumnje uopšte da smo mi svi za taj prijedlog da je od javnog interesa. Da je i Mehmed Mehinović, mislim da bi nas svih 17 glasalo za to. Samo iz tog razloga sam izašao da kažem da niko nije protiv toga da je od općeg javnog interesa. Druga stvar, ja ću se barem potruditi da ne prozivam nikoga, ali u nekim stvarima šutim i gledam i osjetim se prozvanim i neću imenovati ko je izjavio, ali nema vlasnika stranke ovdje u Doboj Istoku. Moja stranka i ako je neko vlasnik te stranke, ja sam vlasnik više nego iko drugi. Prije svega ja sam član te stranke i zastupam interese općine Doboj Istok, a isto tako na sastancima stranke niko mi ne može oduzeti riječ, jer nemamo vlasnika*

*stranke, imamo predsjednika stranke. Ubuduće bar da vodimo računa kada o tim stvarima govorimo.“*

*Omer Konjić, vijećnik SDA: „ Pošto prvi puta izlazim sve bih poselamio i pozdravio. Ja bih zamolio predsjedavajućeg i dopredsjedavajućeg da ove diskusije ograniče i da se držimo dnevnog reda. Došli smo u 10, a sada je pola 1, a imamo obaveza vjerovatno svi mi. Držite se dnevnog reda i ako je tačka dnevnog reda opći interes za sportsku dvoranu da ne pričamo o školi u Stanić Rijeci ili ne znam više o čemu.“*

*Kemal Bratić, općinski načelnik: „ Ja neću diskutovati vezano za ovu tačku, samo bih predložio i zamolio vijećnike da se nakon izjašnjavanja po ovoj tački napravi pauza od pola sata i da se dezinfikuje prostorija, jer mi imamo štab u 13, pa da se sjednica nastavi u 14 sati. Zamolio bih ako ikako možete, jer ja sam računao da ćemo mi završiti do 12, pa da se dezinfikuje da imamo štab civilne zaštite u 13 sati.“*

*Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje: „Pošto izlazim prvi puta želim sve da vas poselamim i pozdravim. Moram da objasnim neke stvari vezano za ovu tačku. Ovo je utvrđivanje javnog interesa i znači da nema ulaganja Općine Doboj Istok bez odluke o utvrđivanju javnog interesa. Kako će Općina Doboj Istok i od drugih nivoa vlasti dobiti novac za izgradnju sportske dvorane ako vi ne donesete odluku o utvrđivanju javnog interesa. Ja vas nisam prekidao. Halo, gospođo ja vas mogu tužiti bez obzira što ste vi vijećnik, vi ste ovdje rekli neke stvari. Pazite, dobit ćete tužbu. Sada ću vam reći. Općina Doboj Istok je vlasnik parcele 1/1, trajno pravo korištenja u C listu je upisana JU OŠ „Brijesnica“ koja je bila Simo Lukić, a sada je „Brijesnica“. Općina Doboj Istok je imala pravo raspolaganja, a pravo raspolaganja je jednako pravo vlasništva. U zemljišnoj knjizi postoji načelo prvenstva upisa. Na osnovu člana 362. Zakona o stvarnim pravima je upisano pravo vlasništva. Ovo što vi pričate o žalbi, to se odnosi na posjed, to je katastar. Znači morate razlikovati šta je posjed, a šta je vlasništvo. U katastru je upisano isto tako pravo korištenja i pravo raspolaganja. To ne može više da stoji u katastru, mora se znati ko je posjednik. Ovaj gospodin je uputio žalbu i ja sam je dobio. To je upravni postupak o čemu vi pričate i tu vi niste ni nadležni, niti možete uticati na to. Znači, imenovali ste svog zakonskog zastupnika kantonalnog pravobranioca koji je svašta napisao. Prvo čovjek ne razlikuje posjed od stvarnih prava. Ja sam donio rješenje na osnovu Zakona o premjeru i katastru nekretnina Federacije BiH, na osnovu kojeg se i izdaju rješenja o posjedu. Posjed je ako ja uzmem vašu jaknu, ja je posjedujem, ali nisam vlasnik. To treba da znate. Katastar zemljišta su tehničke karakteristike zemljišta. Ja vama sada postavljam pitanje. Vi ste vlasnik zemljišta i kada dignete hipoteku uknjiži je u C list, jeste li vi i dalje vlasnik zemljišta? Jeste li ili niste? Kada vi dignete hipoteku, u C listu upiše se hipoteka, jeste li vi i dalje vlasnik zemljišta? Kakve su to gluposti. Na kraju da vam kažem ovo, ova Odluka se odnosi na utvrđivanje javnog interesa za izgradnju dvorane, a ko će je izgraditi, to nije bitno. Općina će učestvovati sa sredstvima i da bi se ta sredstva mogla dati mora se donijeti odluka o utvrđivanju javnog interesa. Općina nakon utvrđivanja javnog interesa, od donesene odluke može ući u eksproprijaciju, ako niste znali ukoliko smatrate da ste vi vlasnik, odnosno ministarstvo. Sada ću vam reći jedan podatak koji vi ne znate. 1996. godine je donesen Zakon o ministarstvima i tim zakonom je formirano i Ministarstvo obrazovanja i u roku od godinu dana Ministarstvo obrazovanja je bilo dužno da riješi imovinsko pravne odnose. To nije urađeno. Sada se nama prebacuje što mi pokušavamo da riješimo. To je hvala što smo riješili ovu parcelu, to je hvala što radimo i borimo se za Luke. Reći ću vam i zašto nismo gradili na onoj parceli. Zato što se ne mogu ispuniti urbanističko tehnički uvjeti. Ne može neko samovoljno reći ovdje se može postaviti ili ne može, jer imaju uvjeti, da ne govorimo o četvrtoj klasi zemljišta za koju je trebalo dati određenu svotu novca za pretvorbu zemljišta. Postavljate pitanje zašto se dole gradi, jeste li čitali da je neplodno zemljište. Za vašu informaciju to je neko odradio, a vi niste ni bili u politici tada. Što se tiče djedova, ako vas baš interesuje moj djed Kloko je dao zemlju.“*

*Selmin Karić, predsjedavajući Općinskog vijeća: „Zaključujem raspravu i tačku dajem na izjašnjavaње. Ko je za usvajanje Odluke o utvrđivanje javnog interesa za izgradnju sportske dvorane u Brijesnici Maloj?“*

*Glasanje: ZA – 10, PROTIV – 0, SUZDRŽANIH – 5 (Zerina Subašić je trenutno odsutna).*

*Predsjedavajući je dao pauzu od 10 minuta radi usaglašavanja klubova.*

*Hasan Hasančević, predsjednik kluba vijećnika SDA, je predložio da rade do 13 sati, jer možda do tada završe sjednicu.*

***Ad.4. Razmatranje i usvajanje prijedloga Odluke o učešću u sufinansiranju nabavke Endoskopskog stuba.***

*Selmin Karić, predsjedavajući Općinskog vijeća: „Tačku dajem na razmatranje. Ima li još prijavljenih? Nema. Komisija za budžet i finansije je razmatrala prijedlog ove Odluke i prihvatila Odluku o učešću u sufinansiranju nabavke Endoskopskog stuba uz zaključak da Općinski načelnik prilikom zaključivanja ugovora sa JZU Opća bolnica „Dr Mustafa Beganović“ Gračanica vodi računa da građani Općine Doboj Istok koji koriste usluge budu adekvatno zastupljeni u korištenju tih usluga. Građani općine Doboj Istok svakako koriste usluge opće bolnice. Ko je za?“*

*Glasanje: ZA – 13, PROTIV – 0, SUZDRŽANIH – 0 (Zerina Subašić, Senada Džanić i Refik Šuvalić su trenutno odsutni).*

***Ad.5. Razmatranje i usvajanje prijedloga Odluke o visini prosječne konačne građevinske cijene 1 m<sup>2</sup> korisne površine građevinskog objekta na području općine Doboj Istok za 2021. godinu.***

*Selmin Karić, predsjedavajući Općinskog vijeća: „ Tačku dajem na diskusiju. Ima li još prijavljenih? Nema. Ko je za?“*

*Glasanje: ZA – 13, PROTIV – 0, SUZDRŽANIH – 0 (Zerina Subašić, Senada Džanić i Refik Šuvalić su trenutno odsutni).*

***Ad.6. Razmatranje i usvajanje Izvještaja o radu Općinskog načelnika za 2020. godinu.***

*Selmin Karić, predsjedavajući Općinskog vijeća: „ Tačku dajem na diskusiju. Ima li prijavljenih? Nema. Ko je za?“*

*Glasanje: ZA – 10, PROTIV – 0, SUZDRŽANIH – 5 (Zerina Subašić je trenutno odsutna).*

***Ad.7. Razmatranje i usvajanje Informacije o provedenim aktivnostima povodom obilježavanja Dana općine Doboj Istok.***

*Selmin Karić, predsjedavajući Općinskog vijeća: „ Informaciju dajem na diskusiju. Ima li prijavljenih? Nema. Ko je za?“*

*Glasanje: ZA – 15, PROTIV – 0, SUZDRŽANIH – 0 (Zerina Subašić je trenutno odsutna).*

*Zahvaljujem se i zaključujem današnju sjednicu Općinskog vijeća.“*

*Sjednica je završena u 12,47 sati.*

ZAPISNIČAR  
Behara Hadžić

SEKRETAR OPĆINE  
Omer Hadžić

PREDSJEDAVALA  
OPĆINSKOG VIJEĆA  
Selmin Karić



*Službena zabilješka:*

*Zapisnik je usvojen na 6. redovnoj sjednici Općinskog vijeća Doboj Istok održanoj dana 29.04.2021. godine.*

*U Klokočnici, dana 30.04.2021. godine*

*Zabilješku sačinio  
Omer Hadžić, sekretar Općine*